

**MESYUARAT KEDUA, PENGGAL PERTAMA
PARLIMEN KEEMPAT BELAS**

2018

HARI KHAMIS : 29 NOVEMBER 2018

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : DATO' ABDULLAH SANI BIN ABDUL HAMID [KAPAR]

TARIKH : 29 NOVEMBER 2018 (KHAMIS)

SOALAN NO. 1

DATO' ABDULLAH SANI BIN ABDUL HAMID minta **MENTERI AIR, TANAH DAN SUMBER ASLI** menyatakan komitmen pemantauan jaminan kualiti air dan mencukupi bagi tujuan domestik di kawasan pedalaman seperti Sabah, Sarawak dan Pantai Timur.

SOALAN NO. 1

JAWAPAN

Tuan Yang di-Pertua,

1. Air terawat yang dibekalkan kepada orang ramai perlu mematuhi standard kualiti minimum iaitu Garis Panduan Mutu Air Minum Kebangsaan yang diterbitkan oleh pihak Kementerian Kesihatan Malaysia (KKM). Garis panduan ini menjadi asas kepada penerbitan *MS 2320:2010 Malaysian Standard: Drinking Water – Quality Requirements* oleh Jabatan Standard Malaysia yang dijadikan sebagai Standard Kualiti Air Minum Kebangsaan. Kebanyakan nilai parameter yang ditetapkan dalam standard tersebut adalah berdasarkan kepada Garis Panduan Kualiti Air yang dikeluarkan oleh *World Health Organization* (WHO).

2. Sebagai badan kawal selia industri bekalan air di Malaysia, Suruhanjaya Perkhidmatan Air Negara (SPAN) bertanggungjawab memastikan kualiti air sentiasa selamat dan terjamin melalui pelaksanaan inisiatif berikut:
 - (i) Audit sistem bekalan air;
 - (ii) Pemantauan kualiti air oleh operator-operator air; dan

(iii) Pemantauan kualiti air oleh pihak ketiga seperti KKM terutamanya bagi Sabah dan Sarawak yang tidak dikawalselia oleh SPAN.

Tuan Yang Dipertua,

3. SPAN juga telah bekerjasama dengan KKM bagi melaksanakan *Water Safety Plan* iaitu satu kaedah yang diperkenalkan oleh WHO untuk mengenal pasti dan menangani risiko-risiko yang boleh menjaskannya kualiti air dari sumber hingga rumah pengguna. Bagi memastikan kualiti air sentiasa selamat dan terjamin, air dianalisa secara berkala di loji rawatan air serta sistem agihan oleh operator air yang melibatkan parameter fizikal, kimia dan bakteriologi.
4. KKM turut melakukan pemantauan kualiti air bagi memastikan air yang dibekalkan mematuhi had piawaian yang ditetapkan berdasarkan Standard Kualiti Air Minum Kebangsaan. Daripada pemantauan secara kerap dan rapi oleh operator air dan KKM, bekalan air yang dibekalkan kepada pengguna di negara ini secara amnya mematuhi standard kualiti minimum yang ditetapkan dan adalah bersih dan selamat.

Sekian, terima kasih

SOALAN NO: 2

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB DATIN MASTURA BINTI MOHD YAZID

TARIKH : 29 NOVEMBER 2018

SOALAN :

Datin Mastura binti Mohd Yazid [Kuala Kangsar] minta **MENTERI SUMBER MANUSIA** menyatakan apakah tindakan drastik Kementerian bagi menyelaraskan dan menghapuskan perbezaan gaji di antara pekerja wanita dan lelaki.

PR-1412-L02379

JAWAPAN

Tuan Yang Di Pertua,

1. Tidak ada perbezaan gaji di antara pekerja wanita dan lelaki bagi pekerjaan yang sama. Penetapan gaji asas pekerja adalah berdasarkan kelayakan, pengalaman dan kemahiran. Peruntukan undang-undang sedia ada di negara ini telah pun memadai dalam memastikan semua pekerja mendapat faedah yang sama rata tanpa diskriminasi. Pendirian Kerajaan berhubung isu ini boleh dilihat melalui asas-asas berikut:

- (i) Akta Majlis Perundingan Gaji Negara 2011 (Akta 732) turut memperjelaskan bahawa semua pekerja adalah berhak mendapat gaji minimum tanpa mengira gender pekerja terbabit. Kerajaan telah menetapkan Gaji Minimum RM1,100 sebulan bagi seluruh Malaysia mulai 1 Januari 2019;
- (ii) Seksyen 60L Akta Kerja 1955 (Akta 265), seksyen 118B Ordinan Buruh Sabah atau seksyen 119B Ordinan Buruh Sarawak yang tidak membenarkan sebarang bentuk diskriminasi kepada pekerja;
- (iii) Malaysia telah pun meratifikasi Konvensyen ILO No.100: *Equal Remuneration* pada tahun 1997. Melalui langkah ini

memperjelaskan komitmen Malaysia di peringkat global bahawa sebarang bentuk diskriminasi adalah tidak wajar.

2. Kementerian ini juga ada menyediakan index gaji permulaan sebagai panduan untuk majikan menetapkan gaji permulaan pekerja.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : PUAN RUSNAH BINTI ALUAI
[TANGGA BATU]**

TARIKH : 29 NOVEMBER 2018 (KHAMIS)

SOALAN NO. 3

Minta **MENTERI PERTANIAN DAN INDUSTRI ASAS TANI** menyatakan adakah langkah Kementerian yang hanya memecahkan monopoli Padiberas Nasional Bhd. (BERNAS) dengan memberi lesen kepada beberapa syarikat berkemungkinan juga membentuk oligopoli yang mengawal pasaran beras.

JAWAPAN

Tuan Yang Dipertua,

Pada ketika ini, hak dan kebenaran mengimport beras (Putih & *Specialty*) diberi kepada BERNAS dengan tanggungjawab BERNAS melaksanakan 5 obligasi sosial. **Setelah perjanjian konsesi tamat pada tahun 2021, Kerajaan akan membuka peluang kepada syarikat-syarikat lain melaksanakan peranan pengedaran beras dan mengambil tanggungjawab terhadap 5 obligasi sosial.**

Perkara ini perlu diteliti dengan terperinci **mengambil kira semua aspek merangkumi sekuriti makanan negara dan kebajikan pemain industri termasuk petani, pengilang serta rakyat keseluruhannya sebagai pengguna akhir**. Perkara ini juga sedang dikaji secara menyeluruh oleh Jawatankuasa Peringkat Menteri Bagi Kajian Semula Dasar Monopoli yang diterajui oleh Kementerian Hal Ehwal Ekonomi. Kerajaan amat mengalu-alukan sebarang pandangan lain untuk diambil kira dan dipertimbang. Dalam hal ini, Kementerian mengucapkan terima kasih kepada Yang Berhormat yang prihatin terhadap isu-isu berkaitan sekuriti makanan terutama beras yang merupakan makanan ruji negara.

Sekian, terima kasih.

**PEMBERITAHUAN PERTANYAAN MESYUARAT KEDUA,
PENGGAL PERTAMA, PARLIMEN KEEMPAT BELAS,
MAJLIS MESYUARAT DEWAN RAKYAT**

PERTANYAAN : LISAN

**DARIPADA : DATO' TUAN IBRAHIM BIN TUAN MAN
(KUBANG KERIAN)**

TARIKH : 29 NOV 2018 (KHAMIS)

SOALAN:

Minta **MENTERI PERTAHANAN** menyatakan apakah langkah-langkah yang sedang diambil oleh pihak Kementerian untuk mengatasi masalah sebahagian besar aset-aset TUDM telah hampir menjangkau usia 20 tahun seperti yang dilaporkan pada sesi mesyuarat lalu secara perbelanjaan berhemah di bawah Bajet 2019.

JAWAPAN

Tuan Yang di-Pertua,

Kementerian Pertahanan amat perihatin terhadap permasalahan sebahagian besar aset-aset Tentera Udara Diraja Malaysia (TUDM) yang hampir dan telah menjangkau usia 20 tahun seperti yang dilaporkan pada sesi mesyuarat yang lalu. Pihak kementerian komited dalam memastikan semua pesawat TUDM sentiasa berada pada tahap yang terbaik untuk dioperasikan. Justeru, TUDM telah menujuhkan satu Tim Kajian yang terdiri daripada *Subject Matter Experts* (SME) bagi penyediaan Pelan Pembangunan Keupayaan TUDM jangka panjang yang dikenali sebagai *Capability Development 2055* (CAP55). Perancangan ini meliputi rancangan perolehan aset dan sistem baru serta peningkatan keupayaan aset dan sistem sedia ada.

Perancangan pembangunan keupayaan TUDM ini menggunakan kaedah *Cost-Benefit Analysis* (CBA) dengan mengambil kira faktor perancangan yang realistik, keberkesanan, kadar kemampuan kewangan negara, polisi had jangka hayat pesawat (*Aircraft Casting Policy*) dan mengikut keutamaan masa yang berfokuskan kepada pengurangan jenis pesawat bagi menangani isu keusangan (*obsolescence*) dan peningkatan kos senggaraan serta menyediakan aset yang mencukupi untuk bertindak atas keperluan pertahanan udara negara. Kajian ini telah selesai dilaksanakan oleh pihak TUDM dan akan dibentangkan kepada pihak kementerian sebelum dibawa kepada Jemaah Menteri.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN CHA KEE CHIN
[RASAH]**

TARIKH : 29 NOVEMBER 2018 (KHAMIS)

SOALAN NO. 5

Minta **MENTERI HAL EHWAL EKONOMI** menyatakan status dan penjelasan tentang pembangunan Malaysia Vision Valley di kawasan Negeri Sembilan, apakah ada semakan atau pindaan terhadap perancangan asal.

JAWAPAN

Yang di-Pertua,

Untuk makluman Ahli Yang Berhormat, Kerajaan pada dasarnya, akan meneruskan mana-mana program atau projek yang boleh memberi manfaat kepada negeri dan rakyat khususnya. Sehubungan itu, projek pembangunan Malaysia Vision Valley (MVV) yang telah dirancang beberapa tahun yang lalu juga akan diteruskan dengan mengambil kira impak positif pembangunan ini kepada Negeri Sembilan.

Untuk makluman Ahli Yang Berhormat, Kerajaan Negeri Sembilan telah memaklumkan bahawa perancangan dan keutamaan projek pembangunan MVV akan diteliti dan disusun semula, dengan keutamaan diberikan kepada pembangunan kawasan perindustrian berteknologi tinggi yang akan memberi impak positif secara langsung kepada pertumbuhan ekonomi negeri dan negara amnya. Projek pembangunan ini kini dikenali sebagai MVV 2.0.

Pembangunan MVV 2.0 adalah merupakan pembangunan terancang yang akan dilaksanakan di segitiga Nilai, Seremban dan Port Dickson melalui perkongsian pintar bersama pihak swasta. MVV Holdings yang merupakan sebuah entiti milik penuh Sime Darby Property akan bertindak sebagai pemaju utama manakala syarikat lain akan bekerjasama dan terlibat dalam melengkapkan pembangunan MVV 2.0. Kerajaan Persekutuan akan terus memainkan peranan sebagai pemudahcara atau *facilitator* kepada pelaksanaan program dan projek MVV 2.0 ini.

Yang di-Pertua,

Mengikut perancangan semula oleh Kerajaan Negeri, pembangunan MVV terbahagi kepada beberapa fasa. Fasa pertama menumpukan pembangunan bersepadu di kawasan Nilai seluas 2,838 ekar, dengan fokus utama kepada *high-technology park*. Kerajaan Negeri juga sedang melaksanakan kajian kemungkinan dan penyediaan pelan induk bagi

NO SOALAN: 5

pelaksanaan projek yang berteraskan aeroangkasa di kawasan ini. Aktiviti yang dipertimbangkan adalah seperti *maintenance, repair and overhaul* (MRO) dan *aero-manufacturing* terutamanya dalam penyediaan akhir pesawat atau *final assembly line* (FAL). Perancangan pembangunan MVV 2.0 ini adalah selari dengan Kajian Separuh Penggal Rancangan Malaysia Kesebelas (KSP RMKe-11) di mana perancangan pembangunan bagi Wilayah Tengah yang merangkumi Negeri Sembilan yang memberi tumpuan kepada kluster ekonomi terpilih termasuklah industri pembuatan (aeroangkasa).

Pelan Pembangunan Komprehensif atau *Comprehensive Development Plan* (CDP) MVV 2.0 yang disediakan telah dijajarkan dengan teras prinsip pembangunan inklusif dan menyeluruh. Di samping itu, Rancangan Tempatan (RT) MVV 2.0 juga sedang dalam proses penyediaan akhir dengan dokumen CDP MVV 2.0 dijadikan sebagai asas rujukan utama. RT MVV 2.0 akan memperincikan konteks pengezonan dan guna tanah kedua-dua Daerah Seremban dan Port Dickson. RT MVV 2.0 juga akan dipamerkan untuk publisiti bagi mendapatkan pandangan daripada orang awam dan dibentangkan kepada Pihak Berkuasa Negeri untuk kelulusan sebelum diwartakan. Adalah dijangkakan proses pewartaan RT MVV 2.0 ini akan selesai sepenuhnya pada bulan Julai 2019.

Sekian, terima kasih.

29 November 2018

Kementerian Hal Ehwal Ekonomi

**PEMBERITAHUAN PERTANYAAN MESYUARAT KEDUA, PENGGAL
PERTAMA, PARLIMEN KEEMPAT BELAS,
MAJLIS MESYUARAT DEWAN RAKYAT**

PERTANYAAN : LISAN

**DARIPADA : DATO' DR. HAJI NOOR AZMI BIN GHAZALI
(BAGAN SERAI)**

TARIKH : 29 NOV 2018 (KHAMIS)

SOALAN

Minta **MENTERI PERTAHANAN** menyatakan apakah Kerajaan bersedia untuk merapatkan jurang perbezaan pemberian pencen veteran ATM yang bersara sebelum 2004 dan selepas 2004 yang sama pangkatnya supaya kebijakan veteran lebih terbela untuk mengharungi kos kehidupan yang lebih mencabar dewasa ini.

JAWAPAN

Tuan Yang di-Pertua,

Kerajaan sentiasa prihatin tentang jurang perbezaan pencen veteran ATM yang berlaku pada masa ini. Malah kesan yang sama turut dirasai oleh para pesara kerajaan di sektor awam.

Di bawah Kementerian Pertahanan, sememangnya telah wujud sebuah badan yang dikenali sebagai Majlis Angkatan Tentera (MAT) yang mempunyai bidang kuasa dalam membuat peraturan-peraturan berkaitan dengan gaji dan pencen ATM seperti yang termaktub di dalam Seksyen 157 dan 187 Akta Angkatan Tentera 1972. Namun begitu, MAT masih tertakluk kepada peruntukan undang-undang di bawah Perkara 137 (2) Perlembagaan Persekutuan serta Perkara 6, Jadual Kesembilan, Perlembagaan Persekutuan yang menyatakan bahawa MAT adalah sebahagian dari jentera kerajaan yang terikat dengan peruntukan Undang-Undang Persekutuan yang berkaitan. Justeru MAT hanya boleh menggangkat ke agensi pusat sebarang cadangan berkaitan isu pencen veteran ATM, namun ianya tiada kuasa mutlak dalam memutuskannya.

Sebagai maklumat, pihak kementerian pada masa ini telah mengarahkan Jabatan Hal Ehwal Veteran ATM (JHEV) untuk membuat kajian merapatkan jurang perbezaan pencen di kalangan veteran ATM.

SOALAN NO.7

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS

PERTANYAAN : LISAN
DARIPADA : TUAN MUSLIMIN BIN YAHYA
[SUNGAI BESAR]
TARIKH : 29 NOVEMBER 2018 (KHAMIS)

SOALAN NO.7

Tuan Muslimin Bin Yahya [Sungai Besar] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah usaha Kementerian untuk memastikan kaunselor berdaftar menggunakan kepakaran untuk membantu pelajar,masyarakat dan kakitangan kerajaan yang mengalami masalah kesihatan mental. Berapakah bilangan mereka di kalangan kakitangan kerajaan yang dikesan atau di rekod mengalami masalah kesihatan mental.

JAWAPAN

Tuan Yang di-Pertua,

Kerajaan menyasar Malaysia mempunyai 11,000 kaunselor profesional menjelang tahun 2020 bagi memastikan ia mencukupi untuk mendepani masalah sosial yang semakin kompleks. Sasaran itu juga akan mengecilkan nisbah seorang kaunselor bagi 2,945 penduduk berbanding seorang kaunselor bagi setiap 4,030 penduduk pada masa ini. Setakat 31 Ogos lalu, terdapat 8,039 kaunselor berdaftar dengan Lembaga Kaunselor. Nisbah ini masih terlalu besar untuk mendepani masalah sosial yang semakin kompleks.

Kementerian ini memandang berat masalah kesihatan mental. Oleh yang demikian, Kementerian melalui Agensi di bawahnya iaitu Bahagian Psikologi dan Kaunseling, Jabatan Kebajikan Masyarakat (JKM) mempunyai 192 kaunselor, Unit Kaunseling, Lembaga Pembangunan Penduduk dan Keluarga Negara (LPPKN) mempunyai 18 orang dan Bahagian Bimbingan dan Kaunseling, Jabatan Pembangunan Wanita (JPW) mempunyai dua (2) orang. Jumlah besar adalah 212 Pegawai Psikologi yang mana 202 daripada itu adalah Kaunselor Berdaftar.

Pegawai Psikologi di Kementerian ini memberikan khidmat kepada mereka dalam bidang kaunseling dengan memfokuskan kepada masyarakat berdasarkan kumpulan sasar Kementerian. Pegawai Psikologi ini ditempatkan di seluruh Negeri dan daerah bagi memberikan perkhidmatan kaunseling kepada masyarakat dalam menghadapi masalah kesihatan mental ini. Antara perkhidmatan yang diberikan adalah Intervensi Kaunseling, Intervensi Psiko Pendidikan (yang merangkumi *coping skills, anger management, stress management*) Perundingan dan Konsultasi, Intervensi Psikologi dan Intervensi Krisis.

Kementerian juga melalui kerjasama strategik dengan Kementerian dan agensi kerajaan yang lain, NGO dan pengamal persendirian juga turut memberikan perkhidmatan kaunseling kepada masyarakat dalam menghadapi masalah kesihatan mental ini, di mana terdapat seramai 1,459 kaunselor berdaftar yang berada dalam perkhidmatan awam,

SOALAN NO.7

3,221 kaunselor berdaftar yang berada dalam bidang perguruan, 697 kaunselor berdaftar di sektor pengajian tinggi, 238 kaunselor berdaftar daripada NGO, dan 2,424 kaunselor berdaftar daripada sektor swasta dan pengamal persendirian. Jumlah besar 8,039 orang.

Izinkan saya memberikan lebih statistik kepada Yang berhormat. Mengikut kaunselor berdaftar, kita ada Orang Melayu (6,081), Orang Cina (1,077), Orang India (377), Bumiputra Sabah (246), Bumiputra Sarawak (130) dan lain-lain (128). Statistik ini menggambarkan populasi di Malaysia di mana kaunselor berdaftar kita mampu berbahasa dalam Bahasa Melayu, Bahasa Inggeris, Bahasa Mandarin, Bahasa Tamil untuk memastikan bahawa kumpulan sasaran menerima kaunseling menerusi bahasa masing-masing (bahasa pengantara mereka). Manakala untuk jantina pula, kaunselor lelaki seramai 2,498 orang dan kaunselor perempuan 5,541 orang.

Untuk soalan spesifik Yang Berhormat mengenai pegawai Kerajaan, berdasarkan Program Penilaian Pekerja yang telah dilakukan oleh Bahagian Pengurusan Psikologi, Jabatan Perkhidmatan Awam (JPA) pada tahun 2017, seramai 2,860 kakitangan kerajaan yang mempunyai simptom masalah kesihatan mental. Apabila kita mengatakan masalah kesihatan mental ini juga merangkumi simptom-simptom kemurungan (*depression*) ataupun sekarang yang lebih *common* adalah *loneliness* di antara warga-warga Malaysia.

Berdasarkan maklumat daripada Jabatan Perkhidmatan Awam (JPA), untuk kes-kes penjawat awam yang mengalami masalah kesihatan mental, JPA akan membantu pegawai untuk mendapat rawatan pemulihan melalui prosedur kaunseling manakala bagi kes-kes yang kritikal akan dirujuk dan dikendalikan oleh Pakar Perubatan.

Bergantung kepada laporan perubatan juga, pegawai yang mengalami masalah mental akan ditentukan sama ada boleh untuk meneruskan tugas (*fit to work*) ataupun tidak.

**PEMBERITAHUAN PERTANYAAN
DEWAN RAKYAT MALAYSIA
MESYUARAT KEDUA, PENGGAL PERTAMA**

PERTANYAAN : JAWAB LISAN

DARIPADA : TUAN ABDUL LATIFF BIN ABDUL RAHMAN [KUALA KRAI]

TARIKH : 29 NOVEMBER 2018 (KHAMIS)

SOALAN : 8

PR-1412-L02315

Tuan Abdul Latiff bin Abdul Rahman [Kuala Krai] minta **MENTERI KOMUNIKASI DAN MULTIMEDIA** menyatakan langkah yang diambil untuk meningkatkan taraf capaian telekomunikasi dan internet terutama di kawasan luar bandar dan juga hospital yang baharu di Kuala Krai.

JAWAPAN

Tuan Yang di-Pertua,

1. Untuk makluman Ahli Yang Berhormat, pihak Kerajaan sentiasa berusaha menambahbaik capaian komunikasi melalui jalur lebar talian tetap dan mudah alih terutamanya di kawasan luar bandar di seluruh negara termasuk kawasan Parlimen Kuala Krai.
2. Di bawah inisiatif Peluasan Liputan Selular dan Jalur Lebar Mudah Alih yang melibatkan pembinaan menara komunikasi baharu dan penaiktarafan menara komunikasi sedia ada kepada perkhidmatan sehingga 4G, sehingga kini, sebanyak 32 menara komunikasi baharu telah siap dibina dan beroperasi di Parlimen Kuala Krai di mana termasuk 2 menara di sekitar hospital baharu Kuala Krai, manakala sebanyak 10 menara di Parlimen Kuala Krai sedang dalam peringkat pelaksanaan.
3. Di samping itu, sebanyak 70 menara sedia ada di Parlimen Kuala Krai di mana termasuk 1 menara di sekitar hospital baharu Kuala Krai telah dinaiktaraf kepada perkhidmatan 3G/4G, manakala 11 menara sedia ada di Parlimen Kuala Krai masih dalam peringkat penaiktarafan.
4. Manakala, di bawah projek Jalur Lebar Pinggir Bandar (SUBB) yang menyediakan perkhidmatan jalur lebar talian tetap dengan kelajuan sehingga 20Mbps, sebanyak 1 ibusawat dalam peringkat pelaksanaan dan dijangka akan siap sepenuhnya sehingga akhir tahun 2019 di Parlimen Kuala Krai.
5. Selain itu, terdapat juga inisiatif Peluasan Rangkaian Gentian Optik bagi membolehkan perkhidmatan jalur lebar berkelajuan tinggi dapat disediakan. Sehingga kini, sepanjang 119 kilometer jaringan teras gentian optik telah siap dilaksanakan di Parlimen Kuala Krai dan sepanjang 150 kilometer masih dalam peringkat pelaksanaan.

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : DATO' MANSOR OTHMAN
[NIBONG TEBAL]**

TARIKH : 29 NOVEMBER 2018 (KHAMIS)

SOALAN : 9

minta **MENTERI PEMBANGUNAN LUAR BANDAR** menyatakan perancangan strategik Kementerian bagi menggalakkan pertumbuhan dan perkembangan industri-industri desa dalam usaha mempertingkatkan lagi pendapatan dan taraf sosio ekonomi penduduk-penduduk luar bandar di seluruh negara.

JAWAPAN

Tuan Yang Di-Pertua,

Untuk makluman Yang Berhormat, dalam usaha mempertingkatkan lagi pendapatan dan taraf sosio ekonomi penduduk-penduduk luar bandar di seluruh negara, Kementerian Pembangunan Luar Bandar telah melaksanakan **Program Desa Lestari** yang merupakan usaha Kerajaan untuk mentransformasikan desa melalui pembangunan ekonomi komuniti. Program ini memperkasakan ekonomi masyarakat luar bandar dengan menggerakkan koperasi sebagai agen pembangunan ekonomi di peringkat kampung.

Sejak diperkenalkan pada tahun 2013 sehingga tahun 2018, sebanyak 103 buah kampung di bawah Program Desa Lestari telah berjaya menjana pendapatan melalui projek-projek yang dilaksanakan di bawah sektor perkhidmatan, pelancongan, penternakan, pembuatan, pertanian dan peruncitan. Pelaksanaan projek di kawasan luar bandar ini turut memberi peluang pekerjaan kepada penduduk-penduduk kampung termasuklah warga emas dan ibu tunggal.

Sehingga tahun 2017, sebanyak **869** pekerjaan telah ditawarkan kepada penduduk luar bandar. Pada tahun 2018, pelaksanaan program ini telah diperkemaskan lagi dengan memperkenalkan konsep baru yang menggalakkan kerjasama strategik antara pihak koperasi kampung dan syarikat-syarikat yang berpengalaman serta berkemahiran dalam sektor yang berkaitan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : DATO' SRI DR. HAJI ISMAIL BIN HAJI ABD.
MUTTALIB
[MARAN]
TARIKH : 29 NOVEMBER 2018 (KHAMIS)

SOALAN NO. 10

Minta **MENTERI KESIHATAN** menyatakan apakah nisbah (perbandingan) jumlah doktor dan pesakit di klinik dan Hospital Swasta dan Kerajaan. Apakah sektor penyakit yang bilangan doktor atau pembantu perubatan yang amat kurang / tidak mencukupi secara perbandingan.

JAWAPAN

Yang di-Pertua,

Indikator keperluan doktor yang digunakan oleh pihak antarabangsa seperti Pertubuhan Kesihatan Sedunia (WHO) adalah nisbah doktor kepada penduduk dan bukanlah nisbah doktor kepada pesakit. Pada tahun 2016, nisbah doktor kepada penduduk bagi **Malaysia** ialah 1:632 berbanding 1:791 pada tahun 2011. Menurut data yang diperolehi dari pihak Pusat Informatik Kebangsaan, **nisbah doktor kepada penduduk pada tahun 2017** yang akan diterbitkan dalam *Health Facts 2018* dan *Health Indicators 2018* adalah **1:554**. Ini menunjukkan jumlah doktor semakin meningkat secara drastik dari tahun ke tahun.

Perkhidmatan kesihatan di KKM diberikan secara menyeluruh berasaskan 3 perkara berikut iaitu :

1. Pencegahan, pengesanan awal penyakit, rawatan awal, pencegahan komplikasi, dan rehabilitasi;
2. Beban penyakit (*Non communicable disease* dan *Communicable disease*); dan
3. Ekspektasi pesakit.

Perancangan keperluan doktor dan penolong pegawai perubatan adalah tidak spesifik kepada penyakit tertentu. Latihan berdasarkan keperluan perkhidmatan dilaksanakan secara berterusan untuk memastikan aktiviti perkhidmatan yang diberikan dapat dijalankan secara efisien.

DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)

PERTANYAAN : LISAN

DARIPADA : YB TUAN HASSAN BIN ABDUL KARIM
[PASIR GUDANG]

TARIKH : 29 NOVEMBER 2018 (KHAMIS)

SOALAN :

Tuan Hassan bin Abdul Karim [Pasir Gudang] minta **PERDANA MENTERI** menyatakan sampai bilakah Malaysia yang mengiktiraf agama Islam sebagai Agama Persekutuan dapat seragamkan undang-undang berkaitan Islam bagi seluruh Persekutuan Malaysia supaya ketidakseragaman antara satu negeri dengan negeri yang lain seperti apa yang berlaku sekarang dapat diatasi.

JAWAPAN : (YB HAJJAH FUZIAH SALLEH, TIMBALAN MENTERI DI JABATAN PERDANA MENTERI)

Tuan Yang di-Pertua,

Untuk makluman Ahli Yang Berhormat, dalam usaha untuk penyelarasan dan penyeragaman undang-undang Islam di seluruh Malaysia, Jawatankuasa Teknikal Undang-Undang Syarak dan Sivil (“Jawatankuasa”) telah ditubuhkan pada 6 Mei 1988. Kajian berterusan telah dijalankan oleh Jawatankuasa ini berhubung dengan ketidakselarasan dan keseragaman undang-undang Islam antara negeri-negeri

Hasil daripada kajian tersebut, enam rang undang-undang telah disediakan untuk dijadikan sebagai model untuk diterimapakai oleh negeri-negeri di seluruh Malaysia.

Setelah melalui pelbagai proses, maka pada 22 Mac 2001 Majlis Raja-Raja telah bersetuju supaya lima rang undang-undang digunapakai di negeri-negeri iaitu:

- (i) Undang-Undang Pentadbiran Agama Islam;
- (ii) Undang-Undang Keluarga Islam;
- (iii) Undang-Undang Keterangan Mahkamah Syariah;
- (iv) Undang-Undang Tatacara Jenayah Syariah; dan
- (v) Undang-Undang Tatacara Mal Mahkamah Syariah.

Kelima-lima rang undang-undang ini telah dipanjangkan ke negeri-negeri untuk diterimapakai.

Pada masa kini, proses penyeragaman undang-undang Islam masih diteruskan oleh Jawatankuasa Teknikal Undang-Undang Syarak dan Sivil dengan menyediakan model draf undang-undang Islam serta pindaan undang-undang sedia ada untuk diterimapakai di seluruh Malaysia.

Antara penambahbaikan yang dilaksanakan adalah cadangan pindaan kepada Akta Pentadbiran Undang-Undang Islam (Wilayah-Wilayah Persekutuan) 1993 [Akta 505] untuk meluaskan kuasa Majlis bagi mengawal selia sekolah agama Islam. Dengan pindaan ini, suatu kaedah akan diwujudkan yang bertujuan, antaranya memasukkan definisi sekolah tahfiz sebagai sebahagian dari definisi sekolah agama yang mana ia akan menjadi model kepada negeri-negeri. Selain daripada itu, cadangan pindaan juga dibuat kepada Akta Tatacara Mal Mahkamah Syariah (Wilayah-Wilayah Persekutuan) 1998 [Akta 585] bagi membolehkan pemakaian kaedah-kaedah khusus yang akan digubal untuk permohonan perkahwinan bawah umur. Kaedah-kaedah yang berbentuk undang-undang subsidiari ini juga diharapkan akan menjadi model kepada negeri-negeri dalam mengendalikan permohonan perkahwinan bawah umur.

SOALAN NO : 11

Kedua-dua cadangan pindaan ini disasarkan pembentangannya pada parlimen sesi ini, manakala kaedah-kaedah disasarkan pada 2019.

Kerajaan juga bercadang untuk membentangkan ke sidang dewan rakyat tahun depan beberapa rang undang- undang yang diharapkan boleh menjadi model kepada negeri-negeri iaitu Rang Undang-Undang Profesional Guaman Syarie dan Rang Undang-Undang Kesalahan Jenayah Syariah (Wilayah-Wilayah Persekutuan) (Pindaan).

Sekian, terima kasih.

**DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)**

PERTANYAAN : LISAN

TARIKH : 29 NOVEMBER 2018 (KHAMIS)

**DARIPADA : Dato' Sri Azalina Othman Said
[Pengerang]**

SOALAN : 12

Dato' Sri Azalina Othman Said [Pengerang] minta **PERDANA MENTERI** menyatakan sebab pelantikan ahli parlimen wanita dalam barisan Kabinet Pakatan Harapan gagal mencapai kuota 30% dan apakah inisiatif yang akan diambil oleh Kerajaan bagi menggalakkan penglibatan wanita dalam arena politik seterusnya meningkatkan jumlah wanita di peringkat pembuat dasar terutamanya dalam Jemaah Menteri.

JAWAPAN: **TUAN MOHAMED HANIPA BIN MAIDIN
TIMBALAN MENTERI
DI JABATAN PERDANA MENTERI**

Tuan Yang di-Pertua,

1. Untuk makluman Ahli Yang Berhormat, Kerajaan sebenarnya telah pun mencapai sasaran 30% penyertaan wanita di peringkat pembuat dasar di sektor awam dengan pencapaian terkini hampir 36% daripada pegawai Kumpulan Pengurusan Tertinggi Kerajaan adalah wanita.
2. Manakala, bagi keahlian lembaga pengarah syarikat pelaburan Kerajaan dan Badan Berkanun pula, usaha bersepadu sedang giat dilaksanakan dengan mengenal pasti calon-calon yang berkelayakan dan mempunyai kemahiran dalam bidang-bidang yang diperlukan

seperti perdagangan, kewangan, perakaunan, undang-undang, pemasaran, pengurusan atau kemahiran yang berkaitan dengan syarikat atau industri di mana syarikat beroperasi dan lain-lain kemahiran yang berkaitan dengan syarikat untuk dilantik sebagai Ahli Lembaga Pengarah. Dalam hal ini, Malaysian Directors Academy (MINDA) dan Non-Aligned Movement (NAM) Institute for the Empowerment of Women (NIEW) juga telah bersetuju untuk berkongsi Women Directors Programme Registry bagi membolehkan Menteri Kewangan Diperbadankan (MKD) mendapatkan calon-calon wanita yang bersesuaian untuk cadangan pelantikan sebagai Ahli Lembaga Pengarah syarikat MKD.

3. Di peringkat Jemaah Menteri pula, walaupun daripada segi bilangan representasi wanita masih boleh ditingkatkan, tindakan Kerajaan Pakatan Harapan melantik YAB Dato' Seri Dr. Wan Azizah Dr. Wan Ismail sebagai Timbalan Perdana Menteri dan Menteri Pembangunan Wanita, Keluarga dan Masyarakat jelas menunjukkan bahawa Kerajaan ini memberikan pengiktirafan yang tinggi terhadap pencapaian, kebolehan serta tenaga bakti yang disumbangkan oleh golongan wanita.
4. Justeru, dengan pengiktirafan tersebut, Kerajaan berharap agar ia akan menjadi pemangkin untuk Ahli-ahli Yang Berhormat wanita yang lain terus diberi peluang dan ruang untuk menyumbang kepada Negara sehingga peringkat yang lebih tinggi.

Sekian, terima kasih.

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN
DARIPADA : TUAN AHMAD BIN HASSAN [PAPAR]
TARIKH : 29 NOVEMBER 2018 (KHAMIS)
SOALAN : 13

minta **MENTERI PEMBANGUNAN LUAR BANDAR** menyatakan adakah Kementerian akan mengkaji semula prosedur yang membolehkan FELCRA dan Giat MARA melantik kontraktor-kontraktor yang ada dalam senarai mereka tanpa pengetahuan wakil-wakil rakyat di setiap Parlimen supaya kontraktor-kontraktor lain yang berwibawa boleh sama-sama bersaing mendapatkan kontrak.

JAWAPAN

Tuan Yang Di-Pertua,

Untuk makluman Yang Berhormat, bahawa semua perolehan kerja, bekalan atau perkhidmatan kepada kontraktor-kontraktor adalah mengikut Manual Perolehan FELCRA Berhad Pindaan 2013 yang diluluskan oleh Ahli Lembaga Pengarah FELCRA Berhad. Kelulusan sesuatu tawaran hendaklah melalui Jawatankuasa Setujuterima Tawaran yang diberi kuasa tertentu untuk setujuterima tawaran mengikut had kuasa masing-masing.

Dimaklumkan juga bahawa tawaran tender terbuka diiklankan di dalam akhbar-akhbar tempatan dan juga laman sesawang rasmi FELCRA Berhad. Kontraktor yang layak menyertai tawaran tender adalah merupakan kontraktor yang memenuhi syarat-syarat ditetapkan. Sebagai contoh, bagi perolehan kerja pembinaan hendaklah berdaftar dengan Lembaga Pembangunan Industri Pembinaan Malaysia (CIDB). Manakala, perolehan kerja bekalan atau perkhidmatan perlu berdaftar dengan Kementerian Kewangan Malaysia (MOF).

Untuk makluman Yang Berhormat juga, perolehan perkhidmatan kontraktor dan bekalan bagi operasi GIATMARA adalah tertakluk kepada peraturan-peraturan yang berkuatkuasa berdasarkan kepada :

- i. Surat Pekeliling Ketua Setiausaha KKLW Bil.2 Tahun 2014.
- ii. Garis Panduan Program Perumahan Rakyat Termiskin Skim Pembangunan Kesejahteraan Rakyat (PPRT,SPKR)- RMKe-11
- iii. Surat Kelulusan Pemanjangan Kemudahan (PRE) bagi melaksanakan PPRT Di Bawah RMKe-11.

Pemilihan kontraktor bagi projek PPRT adalah secara undian dikalangan kontraktor adalah diwajibkan berdaftar dengan CIDB dalam GRED G1. Nilai selenggara (RM200,000), selaras dengan Garis Panduan Program Perumahan Rakyat Termiskin (PPRT) di bawah RMKe-11.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' HAJI AHMAD NAZLAN BIN IDRIS
[JERANTUT]**

TARIKH : 29 NOVEMBER 2018 (KHAMIS)

SOALAN NO. 14

Minta **MENTERI HAL EHWAL EKONOMI** menyatakan implikasi penangguhan projek Kereta Api Berkelajuan Tinggi (HSR) Kuala Lumpur-Singapura dan anggaran kenaikan kos tanah sekiranya proses pengambilan tanah tidak dilakukan pada masa ini.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan Malaysia dan Kerajaan Republik Singapura telah mencapai persetujuan untuk menangguhkan Projek HSR sehingga 31 Mei 2020. Projek HSR ditangguhkan kerana ianya melibatkan komitmen kewangan Kerajaan yang tinggi dan kedudukan kewangan negara pada masa ini tidak mengizinkan.

Salah satu syarat penangguhan yang dipersetujui oleh kedua-dua belah pihak ialah pembayaran *abortive cost* berjumlah RM45 juta oleh Kerajaan Malaysia kepada Kerajaan Republik Singapura. Jumlah ini perlu dibayar selewat-lewatnya pada 31 Januari 2019. Bayaran ini bertujuan membiayai kerja-kerja yang telah dilaksanakan oleh pihak Singapura seperti kerja-kerja pemindahan utiliti, kerja-kerja tanah serta kos operasi bagi *downsizing* (dengan izin) syarikat SG HSR Pte Ltd. Dalam tempoh penangguhan projek HSR, Kerajaan akan mengkaji semula skop projek, *business model* dan kaedah pembiayaan bagi tujuan pengurangan kos keseluruhan projek. Cadangan baharu ini perlu

dirundingkan dengan Kerajaan Singapura bagi mencapai persetujuan dalam menentukan halatuju projek seterusnya.

Anggaran kos semasa bagi pengambilan tanah projek HSR adalah sebanyak RM12 billion. Sekiranya projek diteruskan selepas tempoh penangguhan, dengan mengambil kira faktor infrasi, kos pengambilan balik tanah dijangka akan meningkat di antara 5% hingga 6% (antara RM600 juta hingga RM720 juta) di kawasan bandar dan di antara 2% hingga 3% (antara RM240 juta hingga RM360 juta) di kawasan luar bandar.

Sekian, terima kasih.

29 November 2018
Kementerian Hal Ehwal Ekonomi

NO. SOALAN : 15

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA, PARLIMEN KEEMPAT
BELAS, MAJLIS MESYUARAT DEWAN RAKYAT

PERTANYAAN : LISAN

**DARIPADA : YB PUAN MARIA CHIN BINTI
ABDULLAH [PETALING JAYA]**

TARIKH : 29 NOVEMBER 2018
MENJAWAB

SOALAN : 15

YB PUAN MARIA CHIN BINTI ABDULLAH [PETALING JAYA] minta **PERDANA MENTERI** menyatakan pendirian Kerajaan mengenai hukuman mati serta samada Kerajaan mempunyai rancangan untuk mengkaji semula hukuman mati terutamanya bagi kesalahan berkaitan salah guna dadah.

JAWAPAN: YB DATUK LIEW VUI KEONG
MENTERI DI JABATAN PERDANA MENTERI

Tuan Yang di-Pertua,

Pada 10 Oktober 2018, Kerajaan telah memutuskan untuk memansuhkan hukuman mati dalam semua undang-undang di Malaysia. Pemansuhan ini akan melibatkan 32 kesalahan dalam 8 undang-undang termasuklah bagi kesalahan berkaitan salah guna dadah seperti yang terkandung dalam Akta Dadah Berbahaya 1952. Lapan undang-undang tersebut ialah:

- a) Akta Senjata Api (Penalti Lebih Berat 1971)
- b) Akta Senjata 1960
- c) Akta Penculikan 1961
- d) Akta Angkatan Tentera 1972
- e) Akta Industri Perkhidmatan Air 2006
- f) Akta Perdagangan Strategik 2010
- g) Akta Dadah Berbahaya 1952
- h) Seksyen 302 Kanun Keseksaan

Sekian, terima kasih.

PEMBERITAHUAN PERTANYAAN LISAN DEWAN RAKYAT

MESYUARAT KEDUA, PENGGAL PERTAMA

PARLIMEN KEEMPAT BELAS

PERTANYAAN : LISAN

DARIPADA : YB DATO' SIVARRAAJH CHANDRAN

[CAMERON HIGHLANDS, BN – MIC]

TARIKH : 29 NOVEMBER 2018 (KHAMIS)

SOALAN : 16

Minta **PERDANA MENTERI** menyatakan adakah Kementerian akan menjalankan tindakan yang tegas dan melancarkan beberapa operasi bagi menggantikan Ops Gading bagi membanteras kegiatan penerokaan hutan asing di Cameron Highlands serta mengatasi pekerja PATI yang berleluasa yang menjelaskan sosio-ekonomi penduduk Cameron Highlands.

**JAWAPAN: YB TUAN MOHAMED HANIPA MAIDIN
TIMBALAN MENTERI DI JABATAN PERDANA MENTERI**

Tuan Yang di-Pertua,

1. Kerajaan amat prihatin terhadap isu-isu alam sekitar khususnya yang menjelaskan keselamatan rakyat dan negara. Berhubung isu yang sedang dihadapi di Cameron Highlands, Kerajaan berpandangan bahawa Op Gading merupakan mekanisme yang sudah memadai untuk menangani masalah penerokaan tanah secara haram dan kemasukan Pendatang Asing Tanpa Izin (PATI).
2. Oleh yang demikian, Op Gading akan diteruskan dengan objektif seperti berikut:
 - a) Memastikan tiada pencerobohan tanah-tanah baru;
 - b) Membebaskan Cameron Highlands daripada kebanjiran PATI;
 - c) Memulih dan menghijau semula kawasan perobohan; dan
 - d) Melestarikan Cameron Highlands sebagai destinasi pelancongan.
3. Bagi merealisasikan objektif tersebut, Kerajaan akan menggunakan pendekatan pemantauan berkala, perolehan maklumat risikan daripada pekebun-pekebun serta bekerjasama secara erat dengan agensi-agensi tempatan.

Sekian, terima kasih.

SOALAN NO.17

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS

PERTANYAAN : **LISAN**

DARIPADA : **DATO' NGEH KOO HAM [BERUAS]**

TARIKH : **29 NOVEMBER 2018 (KHAMIS)**

SOALAN NO.17

Dato' Ngeh Koo Ham [Beruas] minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah wang yang digunakan oleh Kerajaan untuk menyambut Hari Wanita untuk tahun 2013, 2014, 2015, 2016, 2017 dan 2018.

JAWAPAN

Tuan Yang di-Pertua,

Kementerian menganjurkan dua Sambutan Hari Wanita melalui Jabatan Pembangunan Wanita (JPW) iaitu Hari Wanita Antarabangsa (HWA) pada 8 Mac dan Hari Wanita Kebangsaan (HWK) pada 25 Ogos setiap tahun. Walau bagaimanapun, tarikh sambutan HWK adalah tertakluk kepada perubahan.

Tujuan sambutan hari wanita diadakan adalah untuk:

- (i) Memberi pengiktirafan terhadap peranan dan sumbangan wanita dalam pembangunan sosioekonomi, kesejahteraan keluarga, masyarakat dan negara; dan
- (ii) Meningkatkan kesedaran masyarakat berhubung isu-isu wanita sejagat dan peranan semua pihak dalam mengarusperdanakan aspek gender serta menghapuskan sebarang diskriminasi gender agar pembangunan dan potensi wanita dapat dipertingkatkan.

Jumlah perbelanjaan dan pengisian program Sambutan Hari Wanita Antarabangsa dan Hari Wanita Kebangsaan bagi tahun 2013 hingga tahun 2018 adalah seperti berikut:

	Hari Wanita Antarabangsa (HWA)		Hari Wanita Kebangsaan (HWK)	
Tahun	Perbelanjaan (RM)	Pengisian Program	Perbelanjaan (RM)	Pengisian Program
2013	629,300.00	- Program Himpunan Sejuta Wanita	935,228.20	- Forum bertemakan “Respek Wanita: Masyarakat Sejahtera”

				- Penyampaian Anugerah Respek Wanita
2014	55,890.00	<ul style="list-style-type: none"> - <i>Purple Walk</i> - Bicara Kepekaan Gender - Persembahan mini Teater 	534,416.40	<ul style="list-style-type: none"> - Forum melibatkan usahawan wanita yang berjaya dan pakar gender - Anugerah Usahawan Wanita Gemilang
2015	107,676.00	<ul style="list-style-type: none"> - Penganugerahan <i>From Zero to Hero</i> - Pertandingan: <ul style="list-style-type: none"> i) Avon Princess in Pink ii) Isteri Kau Ratuku iii) Karaoke Avon - <i>Street Dakwah</i> 	577,388.00	<ul style="list-style-type: none"> - Forum/ Wacana Wanita - Kempen Kaunter/ Lorong Khas untuk Wanita
2016	176,934.50	<ul style="list-style-type: none"> - Bual Bicara Santai - Program Masakan - Zumba - Projek Komuniti (kerja sosial yang memberikan perkhidmatan 	543,722.70	<ul style="list-style-type: none"> - <i>Harmony Walk</i> - Khutbah Jumaat - Kempen Kaunter Khas Wanita (Agensi Kerajaan dan Swasta memberikan perkhidmatan

		kebajikan kepada komuniti di Rumah Kanak-kanak, Rumah Warga Emas, Rumah OKU)		- istimewa pada hari tersebut) - Persembahan Kreatif (Teater Muzikal) - Demostrasi Masakan
2017	153,622.00	<ul style="list-style-type: none"> - Pertandingan Winnovation (Pertandingan Wanita Mencipta Inovasi) - Program Berbasikal “International Bazaar Ride” - Pra Pelancaran Seminar Keusahawanan Wanita Antarabangsa - Program <i>Pocket Event</i> di Pit-Stop: <ul style="list-style-type: none"> i) Booth informasi ii) Permainan Psikologi iii) Penggunaan Gym Percuma di KBS. v) Mobile Spa 	357,214.12	<ul style="list-style-type: none"> - <i>Seminar Global Women Trade Summit</i>

2018	190,089.80	<ul style="list-style-type: none"> - Minister Talk - Tayangan Amal Filem Takdir - <i>Speaker's Corner</i> - Pertunjukan <i>Fashion</i> - <i>Career Comeback Top Supporters Award</i> di bawah Talentcorp 	87,734.00	<ul style="list-style-type: none"> - Sesi Persidangan/Konferens ‘Wanita Harapan Negara’ <p>Topik:</p> <ol style="list-style-type: none"> 1. Cabaran Wanita OKU 2. Hentikan Penindasan Terhadap Wanita 3. Gangguan Seksual 4. Keganasan Rumah Tangga 5. Wanita dan Kepimpinan
-------------	------------	---	-----------	--

**PEMBERITAHUAN PERTANYAAN
DEWAN RAKYAT MALAYSIA
MESYUARAT KEDUA, PENGGAL PERTAMA**

PERTANYAAN : JAWAB LISAN

DARIPADA : DATUK WIRA HAJAH MAS ERMIEYATI BINTI SAMSUDIN [MASJID TANAH]

TARIKH : 29 NOVEMBER 2018 (KHAMIS)

SOALAN : 18

PR-1412-L02768

Datuk Wira Hajah Mas Ermieyati binti Samsudin [Masjid Tanah]
minta **MENTERI KOMUNIKASI DAN MULTIMEDIA** menyatakan jumlah kerugian akibat penipuan atas talian mengikut jenis penipuan.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian Perdagangan Dalam Negeri dan Hal Ehwal Pengguna (KPDNHEP) merupakan Kementerian yang bertanggung jawab memantau, menyelia dan menguatkuasakan peraturan-peraturan berkaitan dengan urusan jual beli dalam talian.
2. Namun begitu, Kementerian Komunikasi dan Multimedia Malaysia (KKMM) melalui Suruhanjaya Komunikasi dan Multimedia Malaysia (SKMM) akan memberi bantuan teknikal apabila sesuatu kes dirujuk secara bertulis oleh KPDNHEP. Sesebuah laman jual beli yang menjalankan operasi urus niaga dalam talian haruslah mengikut dan tertakluk kepada peruntukan Peraturan-peraturan Perlindungan Pengguna (Urus Niaga Perdagangan Elektronik) yang telah diletakkan di bawah kuasa KPDNHEP berkuatkuasa pada 1 Julai 2013.

3. Untuk isu sebegini, KKMM melalui SKMM akan bekerjasama dengan pihak PDRM dan KPDNHEP untuk menjalankan pengesanan, perkongsian maklumat dan aspek forensik digital bagi membanteras jenayah penipuan urus niaga dalam talian.
4. Sebagai langkah untuk mengelakkan penipuan pengguna online di Malaysia, KPDNHEP telah memperkenalkan Akta Perdagangan Elektronik 2016 dan Peraturan-Peraturan Perlindungan Pengguna (Urus Niaga Perdagangan Elektronik) 2012. Semua perniagaan online turut diwajibkan untuk berdaftar dengan SSM.
5. Pihak KPDNHEP melaksanakan langkah-langkah kawalan terhadap laman perniagaan online seperti berikut:-
 - a) Mengalakkan peniaga online bagi mendapatkan pensijilan SSM BizTrust;
 - b) Mewujudkan satu pasukan khas bagi pemantauan secara proaktif dan tindakan secara responsif ke atas aktiviti online;
 - c) Menjalankan naziran dan berkerjasama dengan pengendali tapak pasar dalam talian (online marketplace operator); dan
 - d) Berkerjasama dengan Suruhanjaya Komunikasi dan Multimedia Malaysia (SKMM), Polis DiRaja Malaysia (PDRM) dan CyberSecurity Malaysia.
 - e) Malaysia Specialist Association (MSA) dan Malaysian Advertiser Association (MAA) merupakan ahli Forum Kandungan Komunikasi dan Multimedia Malaysia (Forum Kandungan).

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS

PERTANYAAN : **LISAN**
DARIPADA : **Y.B. TUAN NIK NAZMI BIN NIK AHMAD**
 [SETIAWANGSA]
TARIKH : **29 NOVEMBER 2018 (KHAMIS)**

SOALAN NO. 19

Y.B. TUAN NIK NAZMI BIN NIK AHMAD [SETIAWANGSA] minta **MENTERI KEWANGAN** menyatakan apakah langkah untuk mengurangkan kadar muflis di kalangan golongan muda berikut mudahnya mendapat hutang, kos sara hidup tinggi dan gaji yang rendah.

JAWAPAN

Tuan Yang di-Pertua,

1. Berdasarkan data Jabatan Insolvensi Malaysia, kira-kira 20,000 individu di Malaysia diisyiharkan muflis setiap tahun sejak 2011. Pada 2017, peratusan pecahan muflis dalam kalangan peminjam mencatat peningkatan yang tinggi terutamanya bagi pembiayaan peribadi, iaitu hampir dua kali ganda kes yang direkodkan pada 2011. Peratusan pecahan muflis dalam kalangan golongan muda (individu yang berumur 30 tahun dan ke bawah) pula telah meningkat kepada 13.6% pada 2017 berbanding 11.9% pada 2011. Sementara itu, jumlah hutang isi rumah sebagai nisbah kepada Keluaran Dalam Negeri Kasar (KDNK) telah mencatat 83.2% (RM 1,173.90 bilion) pada akhir September 2018

berbanding 83.8% (RM 1,133.80 billion) pada 2017 [2015: 88.4% (RM 1,023.20 bilion) yang merupakan tahap tertinggi]. Sejumlah besar daripada hutang isi rumah adalah untuk pengumpulan harta kekayaan seperti membeli harta kediaman (52.8%) dan bukan kediaman (6.9%), serta pelaburan dalam dana simpanan (5.6%).

2. Kebanyakan peminjam individu mempunyai tahap hutang yang berhemat. Median nisbah khidmat hutang (*debt service ratio*, DSR) keseluruhan bagi pembiayaan terkumpul ialah 32%. Namun demikian, masih terdapat segmen peminjam yang mempunyai kedudukan kewangan yang lemah. Sebanyak 6.5% daripada keseluruhan peminjam mempunyai margin kewangan negatif. Kebanyakan daripada peminjam ini berpendapatan kurang daripada RM5,000 sebulan dan mempunyai tahap DSR melebihi 60%.

3. Jumlah pinjaman kepada golongan generasi muda pada akhir Jun 2018 merangkumi 10% (RM99 billion) daripada jumlah hutang isi rumah sistem perbankan. Kebanyakan peminjam daripada golongan ini mempunyai DSR pada tahap yang berhemat. Sebanyak dua pertiga daripada generasi muda mempunyai DSR kurang daripada 60% manakala median DSR bagi pembiayaan terkumpul ialah 28.9% (keseluruhan peminjam: 32%). Peminjam dalam kalangan golongan muda yang mempunyai margin kewangan negatif pula adalah lebih rendah berbanding keseluruhan peminjam (6.5%) tetapi meningkat sedikit kepada 5% (2014: 4.1%).

Tuan Yang di-Pertua,

4. Kerajaan telah mengambil beberapa langkah secara berperingkat untuk mengurangkan beban yang ditanggung oleh isi rumah. Langkah tersebut berteraskan dua prinsip iaitu memupuk amalan kredit yang bertanggungjawab dalam kalangan individu dan institusi kewangan serta mengelak isi rumah daripada berhutang secara berlebihan. Perkara ini termasuk syarat kelayakan bagi pemegang kad kredit seperti:

- a. pemegang kad kredit perlu berusia lebih daripada 21 tahun dan mempunyai pendapatan minima tahunan sebanyak RM24,000; dan
 - b. bagi yang berpendapatan kurang daripada RM36,000 setahun, mereka tidak boleh mempunyai lebih daripada dua kad kredit dengan jumlah had kredit tidak melebihi dua kali ganda pendapatan bulanan bagi setiap pengeluar kad kredit.
5. Bank Negara Malaysia sedang bekerjasama dengan Kementerian Perdagangan Dalam Negeri dan Hal Ehwal Pengguna (KPDHEP) dan Kementerian Perumahan dan Kerajaan Tempatan (KPKT) untuk menggubal Akta Kredit Pengguna (AKP) yang akan memperkuuh rangka kerja pengawalseliaan aktiviti kredit pengguna di Malaysia. Antara objektif utama AKP adalah untuk menggalakkan budaya pemberian dan peminjaman kredit yang berhemah dan bertanggungjawab dalam kalangan pemberi kredit dan pengguna bagi memastikan kesejahteraan kewangan isi rumah. Hal ini termasuk keperluan bagi pemberi kredit untuk menjalankan penilaian kemampuan sebelum memberikan pinjaman kepada pengguna untuk memastikan pengguna tidak terdedah kepada risiko pengambilan kredit melebihi tahap kemampuan bayar balik sehingga terpaksa menanggung bebanan hutang yang tinggi.
6. Kerajaan juga berusaha untuk mempertingkatkan kesedaran dan kemahiran pengurusan kewangan dalam kalangan masyarakat. Langkah ini termasuk:
- a. menuahkan Agensi Kaunseling dan Pengurusan Kredit (AKPK) bagi menyediakan khidmat nasihat kewangan dan menstruktur semula hutang untuk membantu individu yang menghadapi masalah menguruskan kewangan dan beban hutang. Dari 2007 hingga Jun 2018, lebih 222,000 peminjam telah menyertai Program Pengurusan Hutang yang dikendalikan oleh AKPK; dan
 - b. melancarkan program Pengurusan Wang Ringgit Anda (POWER!) pada 2011 untuk meningkatkan keupayaan kewangan dalam kalangan pengguna kewangan di Malaysia, terutamanya generasi muda dan mereka yang baru bekerja. Sejak dilancarkan pada 2011

hingga Jun 2018, lebih daripada 204,000 pengguna telah menghadiri program POWER!.

Tuan Yang di-Pertua,

7. Pada 2016, Kerajaan telah membentuk Rangkaian Pendidikan Kewangan (*Financial Education Strategy*, FEN) untuk menghasilkan pendekatan di peringkat kebangsaan yang teratur bagi pendidikan kewangan merangkumi pelbagai aspek pengurusan kewangan dan segmen demografi. Sehubungan ini, FEN sedang merangka Strategi Kebangsaan Celik Kewangan berlandaskan teras seperti:

- a. memupuk nilai kewangan yang bertanggungjawab dari peringkat bangku sekolah;
- b. menggalakkan amalan gaya hidup yang sesuai dengan kedudukan kewangan;
- c. menyemai sikap dan tabiat kewangan yang positif dalam kalangan kumpulan sasaran;
- d. menyokong perancangan kewangan jangka panjang dan perancangan persaraan;
- e. memperkasakan setiap individu dalam pengurusan risiko dan pulangan.

8. Dalam persekitaran kos sara hidup yang tinggi, Kerajaan juga telah mengambil langkah mengurangkan keperluan bagi mendapatkan hutang perumahan seterusnya mengurangkan kadar muflis isi rumah terutamanya dalam kalangan golongan muda. Sejajar dengan matlamat ini, Kerajaan sedang mengambil langkah untuk meningkatkan bekalan rumah mampu milik dan menambah baik pasaran sewa sebagai alternatif yang berdaya maju bagi pemilikan rumah. Pada masa yang sama, Kerajaan juga sedang menambah baik sistem pengangkutan awam bagi mengurangkan keperluan untuk mendapatkan hutang kenderaan bermotor.

SOALAN NO : 20

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : 29 NOVEMBER 2018 (KHAMIS)

SOALAN NO.20

Minta **MENTERI PENDIDIKAN** menyatakan bilangan kes guru duka lara yang telah berjaya diselesaikan sepanjang tempoh pentadbiran Pakatan Harapan sehingga ke hari ini dan sasaran yang diletakkan oleh pihak Kementerian untuk diselesaikan sebelum menjelang 2019.

JAWAPAN

Yang di-Pertua,

Kementerian Pendidikan Malaysia (KPM) sentiasa berusaha menyelesaikan isu pasangan guru yang tinggal berasingan. Isu ini akan terus wujud kerana urusan perpindahan tempat kerja oleh pasangan guru atau guru-guru baharu yang mendirikan rumah tangga sentiasa berlaku sepanjang tahun.

Kriteria utama yang diambil perhatian oleh pihak KPM berhubung permohonan pertukaran guru ini adalah kepentingan perkhidmatan, kekosongan jawatan di negeri yang dimohon dan keperluan opsyen di negeri yang dimohon. Walau bagaimanapun KPM memberi keutamaan kepada pemohon yang memohon alasan untuk mengikut pasangan, selain turut mempertimbangkan juga kelulusan bagi kes-kes lain seperti kes sakit kronik dan kes ancaman keselamatan.

Bagi tahun 2018, daripada 25,332 guru yang memohon pertukaran, sebanyak 6,848 guru yang dikategorikan sebagai kes mengikut pasangan telah memohon pertukaran. Daripada jumlah permohonan tersebut, sebanyak 951 guru yang dikategorikan sebagai kes mengikut pasangan telah diluluskan pertukaran bagi sesi Jun 2018. Baki permohonan sebanyak 5,897 orang akan diproses semula untuk pertimbangan bagi sesi Januari 2019.

Sasaran kelulusan pertukaran guru untuk Sesi Januari 2019 perlu mengambil kira kepentingan perkhidmatan, kekosongan jawatan dan keperluan opsyen di sesebuah negeri. Berdasarkan rekod KPM, bagi setiap sesi pertukaran, kelulusan pertukaran guru mengikut pasangan adalah melebihi 45 peratus daripada jumlah keseluruhan kelulusan pertukaran guru.

Sekian, terima kasih

SOALAN NO. 21

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,,
PARLIMEN KEEMPAT BELAS

PERTANYAAN : LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

TARIKH : 29 NOVEMBER 2018 (KHAMIS)

SOALAN NO. 21:

Tuan Sivakumar Varatharaju Naidu [Batu Gajah] minta

PERDANA MENTERI menyatakan:

Sama ada semua syarikat milik kerajaan (GLC) agensi-agensi Kerajaan Persekutuan, Negeri dan Pihak Berkuasa Tempatan telah diarahkan supaya meletakkan sasaran bahawa 10% daripada bilangan pekerja baharu adalah dari kalangan komuniti India seperti yang dijanjikan dalam Iltizam Khas untuk masyarakat India (Manifesto Pakatan Harapan)

JAWAPAN: YB SEN. WAYTHA MOORTHY A/L PONNUSAMY
MENTERI DI JABATAN PERDANA MENTERI

Tuan Yang di-Pertua,

Ahli Yang Berhormat,

Jawapan ini telahpun YB Menteri memberikan melalui jawapan bertarikh 31 Oktober 2018 semasa menjawab soalan Tuan Karupiya A/L Mutusami [Padang Serai] dan isu ini juga pernah dibangkitkan dalam perbahasan serta sebagai solan tambahan di mana ia telahpun dijawab.

Bagaimanapun, untuk maklumat Ahli-Ahli Berhormat saya akan menjawab persoalan ini sekali lagi dalam dewan yang mulia ini.

Untuk maklumat Ahli-Ahli Yang Berhormat, “Manifesto Pakatan Harapan – Iltizam Khusus untuk Masyarakat India” telah menetapkan sasaran 10% daripada bilangan pekerja baharu adalah di kalangan komuniti India untuk berkhidmat dalam agensi-agensi Kerajaan Persekutuan, Negeri, Pihak Berkuasa Tempatan dan semua Syarikat Milik Kerajaan (GLC).

Sepertimana dimaklumkan juga sebelum ini, SEDIC sedang dalam proses penstrukturran semula agar penyampai perkhidmatan SEDIC dapat dipertingkatkan. Begitu juga bagi merealisasikan inisiatif untuk meningkatkan bilangan masyarakat India dalam sektor awam, SEDIC sedang mengusahakan serta mengadakan siri-siri mesyuarat secara berterusan dengan agensi-agensi Kerajaan yang terlibat dalam pengambilan pekerja supaya bilangan pekerja baharu di kalangan komuniti India dapat ditambah. Antara agensi-agensi yang sudahpun dalam komunikasi dengan SEDIC termasuklah Polis Diraja Malaysia (PDRM), Angkatan Tentera Malaysia (ATM), Suruhanjaya Pelajaran Malaysia (SPP) dan Suruhanjaya Perkhidmatan Awam (SPA).

Terdapat beberapa cabaran bagi merealisasikan inisiatif ini seperti keperluan agensi itu sendiri dari segi kelayakkan akademik serta kompetensi, jumlah permohonan yang diterima, minat serta kelayakkan pemohon. Walaupun adanya cabaran-cabaran tertentu, Kerajaan komited untuk melaksanakan Janji Manisfesto sejauh boleh. Sehubungan dengan itu, pelbagai sesi “engagement” diadakan bersama agensi-agensi perkhidmatan awam mahupun pencari kerja dari kalangan belia India lepasan Ijazah/sekolah yang berminat bekerja di sektor awam.

Oleh itu, saya berharap Ahli Yang Berhormat dapat memberi peluang dan masa kepada Kerajaan agar cadangan 10% tersebut dapat diimplementasikan dalam jangka masa 5 tahun ini. Saya sesungguhnya percaya bahawa hasrat Kerajaan untuk melibatkan 10% masyarakat India daripada bilangan keseluruhan pekerja baharu untuk berkhidmat dalam agensi-agensi Kerajaan Persekutuan, Negeri, Pihak Berkuasa Tempatan dan Syarikat Milik Kerajaan (GLC) akan dapat dicapai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATUK SERI DR. ADHAM BIN BABA
[TENGGARA]
TARIKH : 29 NOVEMBER 2018 (KHAMIS)

SOALAN NO. 22

Y.B. DATUK SERI DR. ADHAM BIN BABA [TENGGARA] minta **MENTERI KEWANGAN** menyatakan status terkini kutipan Tabung Harapan yang diwujudkan pada mulanya untuk membayar hutang negara serta huraikan ke manakah agihan wang tabung tersebut disalurkan.

JAWAPAN

Tuan Yang Dipertua,

Sehingga 27 November 2018 jam 3.00 petang, jumlah terkumpul Tabung Harapan Malaysia (THM) adalah sebanyak RM198,164,349.54.

Sebagaimana yang telah ditetapkan dalam Arahan Amanah THM, semua hasil derma dan sumbangan yang diterima akan digunakan untuk pembayaran hutang Kerajaan Persekutuan sahaja dan setakat ini tiada sebarang pengeluaran dana dibuat bagi tujuan pembayaran hutang. Mekanisme pembayaran hutang negara akan dirangka dan diperhalusi oleh Jawatankuasa Akaun Amanah THM agar proses pembayaran hutang tersebut dapat dilaksanakan secara teratur, telus, berintegriti mengikut peraturan dan perundungan semasa yang berkuat kuasa.

Walaupun THM tidak mungkin boleh melangsaikean semua hutang Kerajaan Persekutuan yang diwarisinya, THM akan kekal menjadi simbol semangat taat setia dan patriotisme rakyat Malaysia untuk melangsaikean hutang negara.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
**DARIPADA : Y.B. TUAN AKMAL NASRULLAH BIN MOHD
NASIR**
[JOHOR BAHRU]
TARIKH : 29 NOVEMBER 2018 (KHAMIS)

SOALAN NO. 23

Y.B. TUAN AKMAL NASRULLAH BIN MOHD NASIR [JOHOR BAHRU] minta **MENTERI KEWANGAN** menyatakan jumlah pendaftaran perniagaan di bawah Cukai Jualan dan Perkhidmatan (SST) yang terkini dan apakah masalah yang dihadapi sepanjang pelaksanaan SST dan bagaimana kerajaan menangani masalah tersebut supaya matlamat pelaksanaan SST tercapai.

JAWAPAN

Tuan Yang di-Pertua,

Untuk makluman Ahli Yang Berhormat, bagi tempoh sehingga 23 November 2018, bilangan syarikat yang berdaftar di bawah SST adalah sebanyak 80,449 perniagaan. Daripada bilangan tersebut, sebanyak 51,563 adalah berdaftar di bawah cukai perkhidmatan manakala sebanyak 28,886 adalah berdaftar di bawah cukai jualan.

Antara masalah yang dihadapi oleh Kerajaan dalam melaksanakan SST adalah kekeliruan yang timbul di kalangan rakyat berkaitan dengan skop kenaan SST serta tempoh masa pelaksanaan yang singkat. Untuk menyelesaikan masalah ini, Kementerian Kewangan dan Jabatan Kastam Diraja Malaysia (JKDM) telah melaksanakan sesi engagement dengan pihak-pihak berkepentingan iaitu pihak industri, dewan perniagaan, badan professional dan persatuan pengguna di seluruh negara. Sesi engagement yang dijalankan ini antara lain membincangkan tentang skop dan model baharu SST dan perbandingan antara SST dan GST terutamanya berkaitan kadar cukai dan skop kenaan cukai. Sebanyak 18 sesi taklimat SST bersama Menteri Kewangan dan Ketua Pengarah JKDM telah dianjurkan oleh pihak JKDM dalam bulan Ogos dan September di mana Menteri Kewangan turun padang ke seluruh Malaysia untuk mengadakan sesi dialog untuk menerima maklum balas serta mendengar aduan daripada pihak peniaga.

Sejak SST dilaksanakan pada 1 September 2018, Kementerian Kewangan dengan kerjasama JKDM telah meneliti segala maklum balas dan rayuan daripada pihak industri dan perniagaan serta rakyat awam dan membuat keputusan untuk mengecualikan beberapa barang dari dikenakan cukai SST serta menyemak semula kadar cukai jualan ke atas barang tertentu. Proses semakan semula kadar cukai SST ini masih berterusan dan keputusan untuk barang yang terpilih akan diumumkan selepas ia dimuktamadkan. Jelas sekali jumlah barang dan perkhidmatan yang akan dicukai di bawah SST adalah jauh lebih kecil daripada semasa era GST. Penyelarasannya adalah

NO SOALAN : 23

bertujuan untuk memastikan proses pengurusan lebih lancar dan juga lebih memudahkan perniagaan-perniagaan supaya kenaan cukai bertindih dapat dielakkan.

Selain daripada itu, JKDM juga telah mewujudkan portal MySST untuk memudahkan pendaftaran oleh perniagaan yang perlu didaftarkan di bawah Akta Cukai Jualan 2018 dan Akta Cukai Perkhidmatan 2018.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN YUSUF BIN ABD. WAHAB
[TANJONG MANIS]**

TARIKH : 29 NOVEMBER 2018 (KHAMIS)

SOALAN NO. 24

Minta **MENTERI PENDIDIKAN** menyatakan adakah perancangan Kerajaan untuk menyambungkan bekalan elektrik dari grid sedia ada ke Sekolah Menengah Kerajaan Semop di Pulau Bruit memandangkan pada masa ini sekolah tersebut masih menggunakan genset sahaja.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian dan berusaha untuk melengkapkan semua sekolah di bawah KPM dengan kemudahan asas seperti bekalan elektrik dan bekalan air bersih. KPM telah mengenal pasti dan menyenaraikan SMK Semop dalam perancangan untuk bekalan elektrik penyambungan bekalan elektrik ke talian grid awam fasa 3 yang akan dilaksanakan pada tahun 2020 hingga 2025. Sementara itu, sekolah tersebut mendapat bekalan elektrik melalui pengoperasian set janakuasa (genset).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL PERTAMA
PARLIMEN KE-EMPAT BELAS**

PERTANYAAN : LISAN

**DARIPADA : TUAN SANISVARA NETHAJI RAYER A/L
RAJAJI [JELUTONG]**

TARIKH : 29 NOVEMBER 2018 (KHAMIS)

SOALAN NO. 25

Minta **MENTERI PENGANGKUTAN** menyatakan sama ada projek LRT (Light Railway Transit) akan dilaksanakan di Pulau Pinang.

JAWAPAN

Yang di-Pertua,

1. Untuk makluman Ahli Yang Berhormat, Kerajaan melalui SPAD telah menerima permohonan Skim Kereta Api bagi projek LRT Pulau Pinang. Berdasarkan beberapa mesyuarat yang telah diadakan antara Menteri Pengangkutan, pihak Kerajaan Pulau Pinang dan SPAD dapat disimpulkan bahawa cadangan Skim Kereta Api bagi projek LRT ini perlu dikemaskini oleh pihak Kerajaan Negeri Pulau Pinang dan dikemukakan semula kepada SPAD untuk proses yang seterusnya.
2. Pihak Kerajaan Negeri Pulau Pinang perlu memastikan bahawa perkara berikut dipatuhi sebelum Skim Kereta Api ini dapat diproses dan seterusnya diangkat untuk kelulusan Menteri:
 - i. SPAD memerlukan kelulusan bagi kajian ‘Detailed Environment Impact Assessment’ (DEIA) dikemukakan sebagai pra-syarat kepada SPAD untuk mempertimbangkan kelulusan Skim Kereta Api;
 - ii. SPAD juga memerlukan kelulusan Majlis Pembangunan Fizikal Negara untuk ‘Penang South Reclamation’ (PSR) dikemukakan memandangkan lokasi depoh terletak di ‘island A’ di dalam PSR; dan
 - iii. Proses keseluruhan sehingga kelulusan muktamad Skim Kereta Api akan mengambil masa sekurang-kurangnya 7 hingga 9 bulan tertakluk kepada semua syarat-syarat dipatuhi.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS

PERTANYAAN : LISAN
DARIPADA : TUAN KHAIRY JAMALUDDIN [REMBAU]
TARIKH : 29 NOVEMBER 2018 (KHAMIS)

SOALAN NO.26

Tuan Khairy Jamaluddin [Rembau] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah langkah-langkah khas yang akan diperkenalkan oleh Kerajaan bagi menambah baik prosedur undang-undang yang melibatkan individu autisme agar polemik yang timbul akibat dakwaan individu autistik mencabul kehormatan baru-baru ini tidak berulang pada masa hadapan.

JAWAPAN

Tuan Yang di-Pertua,

Isu penangkapan dan penahanan seorang remaja autistik yang tular baru-baru ini telah mendapat pelbagai reaksi daripada masyarakat. Kementerian memandang serius isu ini dan bersetuju dengan pandangan agar langkah-langkah khas perlu diperkenalkan oleh Kerajaan bagi menambah baik prosedur undang-undang yang melibatkan OKU termasuk Autisme. Ia bertujuan untuk memastikan polemik yang timbul tidak berulang pada masa hadapan.

Kementerian selaku agensi yang bertanggungjawab mengenai hal ehwal OKU secara keseluruhan, sedia memberikan kerjasama dan input yang diperlukan dalam proses penambahaikan prosedur berkenaan oleh pihak Polis Di Raja Malaysia (PDRM). Kesediaan Kementerian untuk bekerjasama telah dizahirkan kepada pihak PDRM melalui surat kepada Pengarah Jabatan Siasatan Jenayah, Ibu Pejabat Polis Diraja Malaysia Bukit Aman pada 2 November 2018.

Kementerian akan terus meningkatkan usaha bagi melaksanakan sepenuhnya amanah dan tanggungjawab memperjuangkan ***“for the best interest of persons with disabilities”*** agar mereka mendapat hak berdasarkan keserataan dengan orang upaya. Usaha ini adalah selaras dengan Perkara 5 (Aspek Kebebasan Diri dan Ruang-Lingkupnya), Perkara 8 (Hak Sama Rata di Sisi Undang-Undang) dalam Perlembagaan Malaysia.

Selain itu, Kementerian akan mempergiatkan lagi program advokasi seperti *Disability Equality Training (DET)* dan juga *Disability Related Services Training (DRST)* ke arah menyebarluas dan meningkatkan kefahaman masyarakat mengenai Autisme dan cara-cara menyantuni dan berhubungan dengan mereka. Kefahaman ini amat penting bagi mengelakkan berlaku salah faham dalam kalangan masyarakat apabila terdapat individu Autisme berkelakuan atau melakukan sesuatu yang boleh mengganggu atau membahayakan orang lain. Kefahaman ini juga akan

SOALAN NO.26

membolehkan ahli masyarakat turut dapat membantu keluarga Autisme sekiranya berlaku “*tantrum*” di kalangan anak-anak mereka semasa berada di khalayak ramai. Apabila masyarakat memahami simptom atau reaksi awal individu Autisme yang boleh membahayakan sama ada dirinya sendiri atau orang lain, ia akan dapat membantu mencegah sesuatu yang tidak diingini daripada berlaku.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN WONG TIEN FATT@WONG NYUK FOH
[SANDAKAN]
TARIKH : 29 NOVEMBER 2018 (KHAMIS)

SOALAN NO. 27

Y.B. TUAN WONG TIEN FATT@WONG NYUK FOH [SANDAKAN] minta **MENTERI KEWANGAN** menyatakan pelan penurunan kuasa fiskal dari Kerajaan Persekutuan ke negeri Sabah. Adakah Kerajaan Persekutuan merancang berkongsi 50 Peratus pengutipan cukai dari Sabah dengan Kerajaan Negeri Sabah.

JAWAPAN

Tuan Yang di-Pertua,

1. Untuk makluman Y.B. Sandakan dan Dewan Yang Mulia ini, Kerajaan Persekutuan akan terus menunaikan hak dan tanggungjawab kepada semua negeri termasuklah negeri Sabah selaras dengan prinsip keadilan dan kesaksamaan berdasarkan undang-undang yang berkuatkuasa.

2. Di samping itu, Kerajaan sentiasa bertanggungjawab untuk memastikan pembangunan seimbang di seluruh negara. Sehubungan itu, jumlah anggaran perbelanjaan pembangunan pada tahun 2019 secara spesifik kepada semua negeri telah meningkat kepada RM 31.73 bilion, iaitu sebanyak 13.6% daripada RM 27.92 bilion pada tahun 2018. Dari jumlah RM 31.73 bilion tersebut, jumlah untuk negeri Sabah telah meningkat kepada RM 5.01 bilion pada tahun 2019 (atau 15.8% daripada jumlah anggaran pembangunan mengikut negeri) daripada RM 4.13 bilion pada tahun 2018 (atau 14.8% daripada jumlah anggaran pembangunan mengikut negeri). Peruntukan untuk pembangunan negeri Sabah sebanyak RM 5.01 bilion dalam Belanjawan 2019 ini merupakan peningkatan sebanyak 21.3% berbanding pada tahun 2018. Perlu ditegaskan bahawa jumlah perbelanjaan pembangunan yang diperuntukkan bagi negeri Sabah telah meningkat kepada 15.8% berbanding dengan negeri-negeri lain dan bukannya 9% sepertimana yang difitnah oleh pihak yang tidak bertanggungjawab.

3. Dalam usaha memastikan tuntutan dan hak Negeri Sabah dipenuhi, Kerajaan Persekutuan perlu meneliti dengan lebih terperinci dan tertakluk kepada kemampuan serta kedudukan hasil pendapatan Kerajaan Persekutuan. Perkara ini juga telah dijelaskan oleh Yang Amat Berhormat Perdana Menteri semasa beliau mempengerusikan Majlis Kewangan Negara pada 7 Jun 2018. Untuk itu, selaras dengan Teras 4

Buku Harapan, Mesyuarat Jemaah Menteri pada 5 September 2018 telah bersetuju dengan penubuhan Jawatankuasa Khas Kabinet untuk menyemak Perjanjian Malaysia 1963 dan membuat pengesyoran kepada Kerajaan Persekutuan berhubung dengan pelaksanaan hak dan autonomi Sabah dan Sarawak.

4. Jawatankuasa Khas Kabinet untuk menyemak Perjanjian Malaysia 1963 dilaksanakan melalui tiga peringkat iaitu Jawatankuasa Pemandu, Jawatankuasa Teknikal dan Jawatankuasa Kerja yang masing-masing dipengerusikan oleh YAB Perdana Menteri, YB Menteri di Jabatan Perdana Menteri (Undang-Undang) dan pakar-pakar bidang tertentu.
5. Jawatankuasa ini akan memberi keutamaan kepada prinsip keadilan dan kesaksamaan bagi memastikan semua pihak mendapat keadilan seperti yang diperuntukkan di sisi undang-undang negara demi menegakkan “rule of law” di negara kita. Isu ketidakseimbangan pembangunan fizikal dan sosio-ekonomi di antara negeri-negeri di Semenanjung Malaysia berbanding negeri Sabah dan Sarawak akan dapat diberikan penekanan yang lebih serius. Ini sekaligus akan dapat membantu Kerajaan Persekutuan dalam merangka pelan pembangunan ekonomi yang lebih holistik, yang mampu merapatkan jurang ekonomi serta adil dan sama rata di antara negeri-negeri Malaysia. Akan tetapi sebarang cadangan atau formula yang disyorkan mestilah tertakluk kepada kedudukan kewangan mengizinkan yang kini terdesak ekoran skandal kewangan 1MDB yang didokong oleh kerajaan lama.

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB PUAN JUNE LEOW HSIAD HUI

TARIKH : 29 NOVEMBER 2018

SOALAN :

Puan June Leow Hsiad Hui [Hulu Selangor] minta **MENTERI SUMBER MANUSIA** menyatakan adakah sebarang rancangan untuk meningkatkan keselamatan tempat kerja dan melindungi hak pekerja agar dapat mengurangkan bencana tempat kerja yang sering menyebabkan kecederaan dan kematian.

PR-1412-L01923

JAWAPAN

Tuan Yang Di Pertua,

1. Kementerian Sumber Manusia melalui Jabatan Keselamatan dan Kesihatan Pekerjaan (JKKP) telah dipertanggungjawabkan untuk menguatkuasakan perundangan yang berkaitan dengan keselamatan dan kesihatan pekerjaan berdasarkan Akta Keselamatan & Kesihatan Pekerjaan 1994 (Akta 514), Akta Kilang dan Jentera 1967 (Akta 139) dan Akta Petroleum (Langkah-Langkah Keselamatan) 1984 (Akta 302).

2. Sejak tahun 2005 JKKP telah menggandakan usaha penguatkuasaan dengan merancang dan melaksanakan Pelan Strategik 5 Tahun Keselamatan dan Kesihatan Pekerjaan (OSHMP) iaitu OSHMP 2005 -2010, OSHMP 2011 -2015 dan yang terkini adalah OSHMP 2016-2020 bagi mempertingkatkan tahap keselamatan dan kesihatan pekerjaan di tempat kerja. Setakat ini hasilnya telah menyaksikan penurunan kadar kemalangan pekerjaan iaitu 5.16 per 1,000 pekerja pada tahun 2005 kepada 2.81 per 1,000 pekerja pada tahun 2015. Namun kadar kemalangan pekerjaan ini didapati meningkat kepada 2.88 per 1,000 pekerja pada 2016 dan 2.93 per 1,000 pekerja pada tahun 2017. Bagi kadar kematian pekerjaan pula 6.93 per 100,000 pekerja pada tahun 2005 menurun kepada 4.84 per 100,000 pekerja pada tahun 2015. Kadar kematian bagi tahun 2016 kekal 4.84 per 100,000 pekerja dan didapati meningkat pada tahun 2017 iaitu 4.90 per 100,000 pekerja.

3. Antara perancangan dan usaha-usaha berterusan untuk menurunkan kadar kemalangan dan kematian pekerjaan ini, JKKP telah ;
- i. Meningkatkan pemeriksaan dan audit di tempat kerja iaitu 25,398 tempat kerja pada tahun 2010 meningkat kepada 29,037 tempat kerja pada tahun 2017 dan sehingga Ogos 2018 sebanyak 18,991 tempat kerja telah diperiksa dan diaudit.
 - ii. Meningkatkan ketegasan penguatkuasaan dengan meningkatkan bilangan tindakan punitif seperti pengeluaran notis pemberian dan larangan, kompaun dan pendakwaan. Pada tahun 2017, bilangan notis yang dikeluarkan adalah sebanyak 23,006 berbanding 5,835 pada tahun 2010. Pengeluaran kompaun pula sebanyak 801 pada tahun 2017 berbanding hanya 223 pada tahun 2010 dan bilangan pendakwaan juga meningkat kepada 288 pendakwaan pada tahun 2017 berbanding 170 pada tahun 2010. Sehingga Ogos 2018, JK KP telah menjalankan pendakwaan sebanyak 171 kes di mahkamah, 597 kompaun dan 22,052 notis.
 - iii. menjalankan aktiviti-aktiviti promosi dan galakan secara berterusan di tempat kerja melalui program-program seperti seminar, dialog, ceramah, promosi di media cetak dan elektronik, *Facebook* dan lain-lain. Di antara program-program promosi yang spesifik adalah seperti:

- a. Penganjuran Majlis Anugerah Cemerlang Keselamatan dan Kesihatan Pekerjaan Kebangsaan bagi memberi pengiktirafan dan penghargaan kepada syarikat dan individu yang cemerlang dalam keselamatan dan kesihatan pekerjaan pada setiap tahun.
 - b. Penganjuran Sambutan Minggu Keselamatan dan Kesihatan peringkat nasional. Sambutan ini merupakan salah satu usaha kerajaan untuk menghebahkan maklumat terkini berkaitan isu-isu keselamatan dan kesihatan pekerjaan kepada majikan dan pekerja dalam mengamalkan budaya kerja selamat dan sihat di tempat kerja mereka.
 - c. Penganjuran Hari Keselamatan dan Kesihatan Pekerjaan Sedunia. Sambutan ini juga telah disambut bagi memperingati mangsa kemalangan industri dan penyakit pekerjaan oleh Kesatuan-Kesatuan Sekerja di seluruh dunia sebagai sokongan dalam mementingkan keselamatan, kesihatan dan kebajikan para pekerja.
- iv. Menyemak, menggubal perundangan keselamatan dan kesihatan pekerjaan di mana pihak JKPP sedang dalam peringkat akhir untuk membuat pindaan terhadap Akta Keselamatan dan Kesihatan Pekerjaan 1994 antaranya dengan menaikkan kadar denda daripada RM50,000.00 (Lima puluh ribu ringgit) kepada denda Maksima RM500,000.00 (lima ratus ribu ringgit).

- v. Melancarkan dua pelan strategik khusus untuk Tapak Pembinaan dan Industri kecil dan sederhana iaitu Pelan Strategik KKP Tapak Bina dan Pelan Strategik KKP Industri Kecil dan Sederhana (IKS).

Pelan Strategik KKP Tapak Bina

Keberhasilan utama Pelan Strategik ini adalah :

- a. budaya pencegahan diamalkan melalui prinsip-prinsip Garis Panduan Keselamatan dan Kesihatan Pekerjaan di Industri Pembinaan (Pengurusan) (OSHCIM);
- b. bahaya-bahaya projek pembinaan dikurangkan melalui tindakan-tindakan perundangan (*regulatory interventions*)
- c. keberkesanan dan kecekapan JKPP dimaksimumkan melalui pemerksaan kebolehan dan kelengkapan

Pelan Strategik KKP Industri Kecil dan Sederhana

Keberhasilan utama Pelan Strategik ini adalah :

- a. Meningkatkan Pengetahuan dan Kemahiran KKP kepada yang Meningkat;
- b. Bantuan pematuhan KKP yang berkesan;
- c. Budaya pencegahan diterapkan melalui promosi yang berkesan;
- d. Inovasi KKP dihasilkan di kalangan IKS;
- e. Penguatkuasaan KKP yang berkesan; dan
- f. Peningkatan bilangan dan kualiti pengamal KKP sektor IKS.

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA
PARLIMEN KEEMPAT BELAS

PERTANYAAN : LISAN

DARIPADA : DATO' SERI TIONG KING SING [BINTULU]

TARIKH : 29 NOVEMBER 2018 (KHAMIS)

SOALAN :

minta **MENTERI INDUSTRI UTAMA** menyatakan :-

- a) apakah langkah-langkah Kementerian dalam memacu kemakmuran industri sawit Malaysia terutamanya apabila harga minyak sawit semakin menjunam; dan
- b) apakah perancangan Kementerian dalam memastikan kebajikan pekebun-pekebun industri kelapa sawit terjamin walaupun menghadapi tempoh harga minyak sawit yang semakin menjunam.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Industri Utama telah pun melaksanakan beberapa langkah jangka pendek dan jangka masa panjang bagi pemuliharaan harga minyak kelapa sawit.

Antara langkah jangka pendek yang telah pun dilaksanakan ialah meningkatkan penggunaan minyak sawit dalam negara melalui peningkatan adunan biobahan api sawit dengan diesel petroleum dari Program B5 ke Program B7 (adunan 7% biodiesel sawit dan 93% diesel petroleum) mulai November 2014. Program B7 kini menggunakan sekitar 575,000 tan minyak sawit setahun. Kerajaan juga akan melaksanakan program Biodiesel dari B7 kepada B10 pada tahun hadapan. Selain membantu meningkatkan penggunaan minyak sawit ianya juga menyumbang kepada mengurangkan stok minyak sawit dan seterusnya dapat memberi impak yang positif kepada harga minyak sawit mentah (CPO).

Sementara itu, langkah-langkah jangka masa panjang untuk memperkuatkan harga sawit termasuk:

- i. pelaksanaan Skim Pensijilan Minyak Sawit Mampan Malaysia (MSPO) yang akan dijadikan mandatori pada 1 Januari 2020 akan dijadikan satu langkah ke arah mewujudkan sistem kemampuan yang diterima secara global dalam menjenamakan minyak sawit milik Malaysia yang seterusnya diterima sebagai pilihan utama pengguna global. Ini akan membuka akses pasaran yang lebih luas untuk pasaran minyak sawit mampan Malaysia di negara-negara pengimpor;
- ii. memperkuatkan pasaran eksport sedia ada serta menembusi pasaran-pasaran baru bagi produk-produk berdasarkan sawit. Industri sawit negara juga digalakkan untuk meneroka atau memperluaskan perniagaan mereka ke pasaran yang disifatkan

sebagai ‘*niche markets*’ untuk mendapatkan nilai pasaran yang lebih tinggi;

- iii. meningkatkan aktiviti penyelidikan dan pembangunan (R&D) dalam penghasilan produk-produk baru serta memberi nilai tambah kepada produk hiliran komoditi; dan
- iv. penanaman semula pokok yang tidak lagi produktif ketika harga komoditi berada di paras yang rendah juga boleh membantu mengurangkan stok bahan mentah komoditi ini.

Tuan Yang di-Pertua,

Pada masa yang sama, Kementerian juga menyediakan program integrasi tanaman dan integrasi ternakan dengan sawit bagi memaksimumkan penggunaan tanah supaya pekebun kecil sawit persendirian dapat menjana pendapatan tambahan ketika sawit di peringkat pra-matang. Pemberian insentif berjumlah RM3,000 hingga RM11,000 per hektar dalam bentuk input pertanian bagi integrasi tanaman dan penyediaan induk ternakan lembu atau kambing bagi integrasi ternakan disediakan di bawah program ini.

Selain itu, Kementerian juga menyediakan Skim Bantuan Pembelian Jentera dan Alatan (OPIMIS) yang memberi subsidi sehingga 20% daripada harga jentera untuk membantu meningkatkan produktiviti pekebun kecil seterusnya membantu meningkatkan pengeluaran hasil sawit.

Sekian, Terima Kasih

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN AZMAN BIN ISMAIL
[KUALA KEDAH]
TARIKH : 29 NOVEMBER 2018 (KHAMIS)

SOALAN NO. 30

Y.B. TUAN AZMAN BIN ISMAIL [KUALA KEDAH] minta **MENTERI KEWANGAN** menyatakan dasar Kerajaan tentang tender terbuka untuk projek-projek Kerajaan. Setakat manakah Kerajaan berhasrat menggunakan kaedah tender terbuka dan berapa projek telah dibida secara tender terbuka sejak penubuhan Kerajaan PH.

JAWAPAN

Tuan Yang Di Pertua,

Untuk makluman Yang Berhormat, kaedah perolehan secara tender terbuka merupakan suatu kaedah sedia ada dalam tatacara perolehan Kerajaan. Namun demikian, bagi memperkuuhkan lagi pelaksanaan kaedah tender terbuka ini serta demi memastikan persekitaran ekonomi dapat berkembang dan Kerajaan mendapat nilai perolehan yang lebih kompetitif, berkuat kuasa pada 29 Jun 2018 Kerajaan telah memutuskan untuk memansuhkan pelaksanaan perolehan secara Tender Terhad dan memperkenalkan kaedah perolehan secara Tender Terbuka Pra-Kelayakan yang lebih menepati prinsip perolehan Kerajaan iaitu akauntabiliti awam, diuruskan secara telus, nilai faedah yang terbaik, saingan terbuka dan adil dan saksama. Tatacara perolehan yang diamalkan oleh Kerajaan adalah berdasarkan amalan terbaik perolehan di peringkat antarabangsa di mana semua proses perolehan perlu dilaksanakan secara terbuka.

Seterusnya dalam memastikan ketelusan dalam urusan perolehan yang diamalkan, semua maklumat berhubung iklan tawaran tender terbuka serta keputusan tender terbuka boleh diperolehi dengan melayari MyPROCUREMENT Portal di laman sesawang <http://myprocurement.treasury.gov.my/>.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN NOOR AMIN BIN AHMAD
[KANGAR]
TARIKH : 29 NOVEMBER 2018 (KHAMIS)

SOALAN NO. 31

Y.B. TUAN NOOR AMIN BIN AHMAD [KANGAR] minta **MENTERI KEWANGAN** menyatakan apakah langkah-langkah baru yang akan diambil untuk memastikan negeri Perlis tidak lagi menerima pemberian defisit Kerajaan Persekutuan pada tahun-tahun akan datang.

JAWAPAN

Tuan Yang di-Pertua,

1. Untuk makluman Y.B. dan Dewan yang mulia ini, adalah menjadi tanggungjawab Kerajaan Negeri termasuk Kerajaan Negeri Perlis dalam memastikan kedudukan kewangan negeri kukuh dan mampan. Namun demikian, sebagai sebuah Kerajaan Persekutuan yang bertanggungjawab, Kerajaan Persekutuan sentiasa dari semasa ke semasa memantau dan membantu negeri-negeri untuk mengukuhkan kedudukan kewangan bagi memastikan negeri-negeri mampu melunaskan kos-kos pengurusan negeri yang ditanggung. Kedudukan kewangan Kerajaan Negeri adalah merupakan agenda utama dalam Mesyuarat Majlis Kewangan Negara setiap tahun yang dipengerusikan oleh YAB Perdana Menteri dan dihadiri oleh semua YAB Menteri-Menteri Besar dan Ketua-Ketua Menteri selaras dengan perkara 108 Perlembagaan Persekutuan.

2. Kerajaan Persekutuan juga prihatin terhadap negeri-negeri yang mempunyai kedudukan ekonomi dan kewangan yang agak terhad. Justeru itu, Kerajaan Persekutuan juga akan mencari kaedah yang bersesuaian supaya kedudukan ekonomi dan kewangan bagi negeri-negeri yang berkenaan dapat ditingkatkan, secara langsung akan mengimbangi kedudukan ekonomi dan kewangan di seluruh negara.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' HASBULLAH BIN OSMAN
[GERIK]
TARIKH : 29 NOVEMBER 2018 (KHAMIS)

SOALAN NO. 32

Y.B. DATO' HASBULLAH BIN OSMAN [GERIK] minta **MENTERI KEWANGAN** menyatakan mengapakah nilai ringgit semakin jatuh sejak selepas PRU ke 14 sehingga turun ke tahap RM4.15 per Dolar Amerika dan apakah langkah-langkah yang diambil untuk mengatasinya.

JAWAPAN

Tuan Yang di-Pertua,

1. Sehingga 21 November 2018, nilai ringgit telah menyusut sebanyak 3.5% manakala nilai mata wang serantau yang lain telah menyusut sebanyak 1% hingga 7.2% berbanding dolar AS. Walau bagaimanapun, berbanding dengan mata wang serantau, prestasi ringgit adalah lebih stabil. Ringgit telah menambah nilai sebanyak 1.6% berbanding peso Filipina dan 4.2% berbanding rupiah Indonesia bagi tempoh yang sama.

2. Faktor utama kejatuhan nilai ringgit serta mata wang serantau kebelakangan ini adalah akibat aliran keluar dana asing yang didorong oleh faktor-faktor luaran, antaranya:

- ketidakstabilan pasaran dunia akibat risiko perang perdagangan (*trade war*) antara Amerika Syarikat – China;
- kenaikan kadar faedah oleh bank pusat Amerika Syarikat menyebabkan pelabur menilai dan mengimbangi semula kedudukan portfolio mereka dalam pasaran kewangan “ekonomi sedang pesat membangun” (*emerging economies*); dan
- kebimbangan mengenai risiko kesan penularan (*contagion effect*) dalam kalangan mata wang ekonomi sedang pesat membangun berikutan kejatuhan ketara peso Argentina dan lira Turki, yang telah menyusut nilai sebanyak 48.7% dan 28.4% masing-masing berbanding dengan dolar AS sehingga 21 November 2018.

Tuan Yang di-Pertua,

3. Dalam keadaan pasaran kewangan global yang tidak menentu ini, kadar pertukaran ringgit yang fleksibel telah memainkan peranan yang penting sebagai penyerap kejutan luaran tanpa menjelaskan aktiviti ekonomi domestik. Namun begitu, volatiliti ringgit yang ketara boleh menjelaskan aktiviti ekonomi berikutan kesukaran sektor perniagaan dan perindustrian merancang strategi dan mengambil keputusan yang wajar. Oleh itu, Kerajaan akan sentiasa memastikan keadaan pasaran kewangan lebih lancar dan mengambil langkah proaktif dengan memperkenalkan langkah-langkah untuk memastikan kecairan yang mencukupi, pasaran yang berdaya tahan dan mengurangkan aktiviti spekulasi dalam pasaran.

4. Antara langkah-langkah tersebut adalah penetapan syarat supaya sebahagian besar hasil eksport dalam mata wang asing ditukar kepada ringgit. Langkah ini bertujuan menambahkan mudah tunai wang asing dalam pasaran dalam negeri dan peningkatan penguatkuasaan ke atas peraturan tukaran asing sedia ada bagi mencegah mata wang ringgit diniagakan di luar pesisir bagi mengekang aktiviti spekulasi.
5. Liberalisasi progresif peraturan pentadbiran tukaran asing juga menghasilkan lebih banyak rizab yang tidak berpusat. Perkara ini dicerminkan dalam peningkatan pemerolehan aset di luar negara oleh bank dan korporat pemastautin. Secara khususnya, bank dan korporat pemastautin memegang tiga perempat daripada aset luar negeri Malaysia yang boleh digunakan untuk memenuhi obligasi hutang luar negeri tanpa membuat sebarang tuntutan ke atas rizab antarabangsa BNM.
6. Kesan kejatuhan nilai mata wang ringgit terhadap inflasi keseluruhan pada sembilan bulan pertama 2018 juga kekal rendah, memandangkan harga bahan api yang diimport telah ditetapkan sejak akhir Mac 2018. Di samping itu, barang import lain hanya mencakupi sebahagian kecil daripada penggunaan dalam negeri. Sebagai contoh, bahan mentah dan bahan pengantara yang diimport hanya mencakupi sekitar 20% daripada jumlah pengeluaran produk dalam Indeks Harga Pengguna Malaysia (IHP). Tidak termasuk bahan api, import barang siap pula mencakupi 7% daripada bakul IHP. Untuk makluman Ahli Yang Berhormat, kadar inflasi bagi tempoh Mei 2018 hingga Oktober 2018 adalah seperti berikut:

Bulan	Kadar Inflasi (%)
Mei 2018	1.8
Jun 2018	0.8
Julai 2018	0.9
Ogos 2018	0.2
September 2018	0.3
Oktober 2018	0.6

7. Dalam jangka masa panjang, nilai ringgit akan didorong terutamanya oleh kekuatan asas ekonomi negara. Sehubungan itu, Malaysia perlu menumpukan usaha untuk meningkatkan daya tahan ekonomi dengan mempelbagaikan sumber ekonomi, memperkuuh daya saing ekonomi dan kedudukan fiskal negara. Paras rizab antarabangsa BNM pula dijangka akan disokong dengan pemulihan kestabilan pasaran dunia, penambahbaikan sentimen pelabur dan lebihan akaun semasa negara yang kekal positif. Dengan ini, prestasi ringgit, rizab negara dan pasaran modal akan terus meningkat seiring dengan pengukuhan asas ekonomi negara dan pasaran kewangan global.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB DATUK AHMAD JAZLAN B. YAAKUB
(MACHANG)**

SOALAN : 33

Datuk Haji Ahmad Jazlan bin Yaakub [Machang] minta MENTERI DALAM NEGERI menyatakan :-

- (a) adakah terdapat masalah kepadatan di penjara-penjara sedia ada di seluruh negara dan adakah pihak Kementerian mempunyai perancangan untuk membuka penjara baru; dan
- (b) berapakah jumlah banduan rakyat tempatan mengikut pecahan kaum, jantina serta umur.

JAWAPAN

Tuan Yang Di Pertua,

- (a) Rekod Jabatan Penjara Malaysia pada 1 Oktober 2018 menunjukkan terdapat seramai 59,245 orang banduan sedang menjalani hukuman di penjara seluruh negara manakala jumlah kapasiti penjara di seluruh negara adalah seramai 45,712. Statistik ini juga menunjukkan terdapat beberapa buah penjara yang mengalami kesesakan.

Punca utama kesesakan di beberapa buah institusi penjara adalah kerana kemasukan banduan yang tinggi terutamanya banduan warga asing, di mana pada ketika ini terdapat seramai 13,857 orang banduan warga asing (23.3%) daripada jumlah keseluruhan banduan (59,245 banduan).

Bagi menangani masalah kesesakan ini, Kementerian Dalam Negeri tidak mengambil pendekatan untuk membina penjara baru. Sebaliknya, beberapa langkah lain telah diambil untuk mengatasi masalah tersebut. Antaranya adalah:

- i. Melaksanakan pemindahan banduan dari penjara sesak ke penjara yang tidak sesak;
- ii. Mempergiatkan pelaksanaan Sistem Parol, Perintah Kehadiran Wajib dan Pusat Pemulihan Pemasyarakatan yang mana kini telah melibatkan seramai 41,375 menjalani pemulihan di luar penjara;

- iii. Meningkatkan keberkesanan program Pembangunan Insan yang meliputi pemulihan dan pembentukan disiplin bagi mengurangkan kemasukan semula banduan ke penjara selepas mereka dibebaskan. Selain itu, banduan juga diberi kemahiran termasuk secara bersijil dan peluang melanjutkan pengajian ke peringkat pengajian tinggi bagi membolehkan banduan mendapat tawaran pekerjaan setelah dibebaskan;
 - iv. Mengubahsuai penjara sedia ada bagi meningkatkan kapasiti;
 - v. Kerjasama dengan Mahkamah dan Jabatan Imigresen Malaysia bagi mempercepatkan proses penghantaran pulang banduan warga asing yang telah selesai menjalani hukuman; dan
 - vi. Meneliti lain-lain bentuk alternatif kepada hukuman pemenjaraan dan pelaksanaan program pemulihan di luar penjara yang mungkin boleh dilaksanakan di Malaysia.
- (b) Berdasarkan kepada statistik Jabatan Penjara Malaysia pada 1 Oktober 2018, jumlah banduan rakyat tempatan adalah seramai 45,388 orang. Daripada jumlah tersebut, seramai 30,927 adalah kaum Melayu, 4,079 kaum Cina, 5,385 kaum India dan 4,997 lain-lain kaum.

Manakala seramai 43,606 orang banduan adalah lelaki dan 1,782 orang adalah wanita. Bagi kategori umur pula, seramai 43,956 orang banduan adalah banduan dewasa yang berumur 21 tahun ke atas, dan bagi yang berumur 21 tahun ke bawah seramai 1,432 banduan adalah banduan muda.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 29 NOVEMBER 2018 (KHAMIS)

SOALAN NO. 34

Minta **MENTERI BELIA DAN SUKAN** menyatakan apakah usaha-usaha yang sedang dan akan dibuat oleh Kementerian dalam mendekati golongan belia, terutamanya para graduan universiti agar mereka dapat memanfaatkan masa terluang dengan perkara-perkara berfaedah sekali gus mengelakkan para belia ini dari terjebak dengan najis dadah ataupun kes-kes jenayah sosial.

JAWAPAN

Yang di-Pertua,

1. Untuk makluman Ahli Yang Berhormat, dalam usaha mendekati golongan belia sebagai ‘Rakan Kongsi Pembangunan Negara’, Kementerian Belia dan Sukan (KBS) melalui Jabatan Belia dan Sukan Negara (JBSN) telah mengambil inisiatif berterusan menerusi pelaksanaan program-program ke arah *Positive Youth Developement* (PYD) yang mengiktiraf potensi belia dibangunkan melalui cara yang positif serta bersesuaian, sekali gus menghindarkan para belia dari terjebak dengan najis dadah ataupun kes-kes jenayah sosial.
2. Justeru, bagi mendekati golongan belia, terutamanya para graduan universiti agar mereka dapat memanfaatkan masa terluang dengan perkara-perkara berfaedah, pihak Kementerian telah merangka dan melaksanakan program-program PYD yang telah diklusterkan kepada empat (4) bidang utama iaitu kepimpinan, pembangunan sosial dan pembangunan insan, pengupayaan dan pengiktirafan pertubuhan belia serta bakat belia berlandaskan Perlembagaan Persekutuan dan Rukun Negara. Antara program-program PYD yang dilaksanakan oleh KBS dalam usaha menyerlahkan potensi mahasiswa adalah seperti Program Felo Perdana dan Program Debat.
3. Program Felo Perdana adalah bertujuan untuk memberi pendedahan kepada mahasiswa (Felo) yang cemerlang dan berbakat secara langsung dalam urusan tadbir negara. Manakala, penganjuran Program Debat pula bertujuan untuk menjana dan menggalakkan minat para belia dalam perbincangan berkenaan isu-isu polisi awam, platform untuk belia menyuarakan pandangan dengan cara yang lebih profesional serta meningkatkan kesedaran masyarakat mengenai isu semasa yang boleh membawa kepada keputusan dan tindakan dasar mengikut kapasiti individu, kumpulan dan sesebuah institusi.

4. Pada masa yang sama, pihak Kementerian telah merancang komponen baru didalam Program Rakan Muda seperti Program Gaya Hidup yang melibatkan Rakan Inovasi, Cinta Alam, Kecergasan, Masyarakat, Seni Budaya, Rakan Muda @ Komuniti, Rakan Muda @ Kampus dan Rakan Muda MyCamp.
5. Pihak Kementerian juga sedang giat merancang pelaksanaan program Rakan Muda @ U sebagai usaha untuk membentuk belia yang berfikiran kreatif dan inovatif serta mempunyai iltizam diri dalam memacu jati diri yang positif. Sasaran penyertaan program adalah pelajar universiti dengan penyerahan jati diri positif di kalangan generasi muda menjadi keutamaan.
6. KBS juga telah merangka pelbagai aktiviti sukan melalui penglibatan pihak NGO setempat bagi melibatkan lebih ramai belia mengikuti aktiviti Sukan Untuk Semua. Sebagai contoh aktiviti FitMalaysia@hotspot dan Liga Sukan untuk Semua (LiSUS) yang dilaksanakan di peringkat daerah dan negeri anjuran KBS turut melibatkan penyertaan sehingga ke peringkat akar umbi.
7. Secara umumnya program yang dilaksanakan ini berupaya mencegah dan menangani masalah jenayah serta memenuhi keperluan jati diri dan rohani dikalangan belia dalam usaha ke arah *Youth Power* yang bertujuan untuk memperkasakan belia.

Sekian, terima kasih.

DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)

PERTANYAAN : **LISAN**

DARIPADA : **YB DATO' DR. SHAMSUL ANUAR BIN HAJI
NASARAH [LENGGONG]**

TARIKH : **29 NOVEMBER 2018 (KHAMIS)**

SOALAN:

Dato' Dr. Shamsul Anuar bin Haji Nasarah [Lenggong] minta **PERDANA MENTERI** menyatakan apakah pendirian Kerajaan terhadap golongan transgender ataupun lebih dikenali sebagai LGBT yang dilihat lebih meraikan mereka dan fahaman liberalisnya berbanding agenda memartabatkan agama Islam di dalam negara.

JAWAPAN : (YB DATUK SERI DR MUJAHID YUSOF,
MENTERI DI JABATAN PERDANA MENTERI)

Tuan Yang Di-Pertua,

Pendirian kerajaan terhadap golongan transgender adalah untuk membimbing mereka menjalani kehidupan yang lebih sejahtera dan selari dengan tuntutan agama. Kerajaan juga menyedari keperluan untuk mengeluarkan mereka sebagai pekerja seks dan menawarkan bimbingan kerjaya dan latihan kemahiran yang bersesuaian. Pada waktu yang sama, golongan transgender misalnya perlu mengambil kira sensitiviti, serta adat dan budaya setempat masyarakat agar mereka berupaya menyesuaikan diri dalam masyarakat.

Berhubungan fahaman liberalisme yang berusaha untuk mempromosikan gaya hidup LGBT secara terbuka, mencadangkan perkahwinan sama jenis serta menghapuskan hukuman yang sedia ada berhubung perlakuan LGBT di dalam undang-undang sivil mahupun Enakmen Jenayah Syariah Negeri-Negeri, maka Kerajaan bertegas bahawa tidak sekali-kali bersetuju dengan perkara ini, sebaliknya meneguhkan konsep keluarga asas dalam konteks negara kita adalah terdiri daripada lelaki (ayah) dan perempuan (ibu) serta mempunyai anak hasil daripada hubungan kelamin berdasarkan ikatan perkahwinan yang sah.

Sekian, terima kasih.

SOALAN NO : 36

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

DARIPADA : DATUK ABD RAHIM BIN BAKRI [KUDAT]

TARIKH : 29 NOVEMBER 2018 (KHAMIS)

SOALAN NO. 36

Minta **MENTERI PENDIDIKAN** menyatakan apakah status cadangan projek bina baru SMK Bongkol, Pitas. Bilakah projek pembinaan tersebut dapat dimulakan memandangkan pelajar sekolah ini masih menumpang di bangunan Sekolah Rendah Bongkol sejak sekian lama.

JAWAPAN

Yang di-Pertua,

Kementerian Pendidikan Malaysia (KPM) sentiasa berusaha menyediakan bangunan sendiri untuk sekolah-sekolah yang menumpang bagi memastikan proses pengajaran dan pembelajaran dilaksanakan dengan efektif dalam suasana yang kondusif.

Untuk makluman Ahli Yang Berhormat, projek membina bangunan Sekolah Menengah Kebangsaan Bongkol, Pitas, Sabah telah diluluskan gantian penuh dalam Rancangan Malaysia Ke-11 dengan skop projek membina 18 bilik darjah dan lain-lain kemudahan, asrama untuk menampung 200 murid dan 16 unit rumah guru. Projek ini adalah di bawah pelaksanaan pihak Jabatan Kerja Raya dan kini sedang dalam proses perolehan.

Sekian, terima kasih.

RJM125

PEMBERITAHUAN PERTANYAAN
DEWAN RAKYAT MALAYSIA
MESYUARAT KEDUA, PENGGAL PERTAMA

PERTANYAAN : **LISAN**
DARIPADA : **DATUK SERI HAJI AHMAD BIN HAMZAH**
KAWASAN : **JASIN**
TARIKH : **29 NOVEMBER 2018**

SOALAN

Datuk Seri Haji Ahmad bin Hamzah [Jasin] minta **MENTERI PERDAGANGAN ANTARABANGSA DAN INDUSTRI** menyatakan impak perang perdagangan antara USA dan China ke atas perdagangan dan ekonomi dunia amnya dan Malaysia khasnya serta usaha-usaha untuk melindungi negara daripada kesan tersebut.

JAWAPAN

Tuan Yang Dipertua,

1. Bagi tempoh Januari hingga Ogos 2018, nilai dagangan Malaysia berkembang sebanyak 6% kepada RM1.2 trillion berbanding dengan tempoh yang sama pada tahun 2017. Ini disumbang oleh nilai eksport melalui peningkatan sebanyak 6.3% kepada RM650.6 billion, manakala nilai import pula agak perlahan pada kadar 5.6% kepada RM580.1 billion. Bagi tempoh ini, Malaysia mencatatkan lebihan dagangan sebanyak RM70.5 billion iaitu peningkatan sebanyak 11.9%.
2. Bagi perdagangan dua hala pula, nilai dagangan dengan RRC bagi 8 bulan pertama 2018 berkembang 9.6% kepada RM206.19 bilion berbanding tempoh yang sama tahun lepas. Eksport ke RRC mengukuh sebanyak 11% kepada RM89.31 bilion.
3. Bagi dagangan dua hala dengan Amerika Syarikat, bagi tempoh Januari – Ogos 2018, nilai dagangan adalah sebanyak RM101.50 bilion, menurun sebanyak 1.5% berbanding tempoh yang sama pada tahun 2017. Walaubagaimanapun, eksport Malaysia ke AS meningkat sebanyak 1.2% kepada RM59.18 bilion manakala import dari AS menurun 5% kepada RM42.32 bilion.

Tuan Yang Dipertua,

4. Bagi prestasi pelaburan pula, secara dasarnya, Malaysia sentiasa menjadi antara destinasi pelaburan utama bagi pelabur-pelabur asing. Kedudukan Malaysia yang strategik serta persekitaran perniagaan yang kondusif menyebabkan Malaysia terus dilihat sebagai sebuah negara yang kompetitif dan berdaya saing.
5. Setakat suku kedua 2018, kedudukan pelaburan langsung asing (FDI Stock) [dengan izin] telah direkodkan sebanyak RM590 juta. Ini

merupakan peningkatan sebanyak 6%, berbanding tempoh yang sama tahun lalu.

6. Daripada petunjuk-petunjuk ini, kita melihat kesan-kesan ketegangan perdagangan antara Amerika Syarikat dan China kepada Malaysia masih di tahap terkawal dengan pertumbuhan perdagangan yang kekal positif.
7. Walau bagaimanapun, kita tidak harus berasa selesa dengan keadaan ini kerana jika keadaan konflik ini berlarutan, impak jangka panjang mungkin akan menjelaskan perdagangan Malaysia dan keadaan ekonomi secara amnya.

Tuan Yang Dipertua,

8. Disebabkan ketidaktentuan konflik perdagangan ini, Pertubuhan Perdagangan Dunia (*World Trade Organisation*) [dengan izin] telah menilai semula unjuran pertumbuhan perdagangan dunia dari 3.9% pada tahun 2018 kepada 3.7% pada tahun 2019. Begitu juga dengan Tabung Kewangan Antarabangsa (IMF), di mana mengunjurkan bahawa pertumbuhan GDP akan menguncup dari 3.9% kepada 3.7% pada tahun 2018.
9. Selain dari kerisauan ke atas penguncupan nilai dagangan dan pertumbuhan ekonomi, terdapat jangkaan kesan positif pada rantau Asia di mana syarikat-syarikat besar atau MNC di Amerika Syarikat atau RRC dan akan mula berfikir untuk menukar lokasi pengeluaran dan strategi perniagaan bagi mengelak dari terkesan secara langsung dengan tarif yang dikenakan oleh AS ke atas RRC. Akibat kenaikan cukai import di Amerika Syarikat dan China akan secara langsung meningkatkan harga barang import dan juga kos. Ini secara tidak langsung akan menggalakkan pengaliran masuk pelaburan ke negara-negara lain seperti Asia, khususnya di sekitar negara-negara ASEAN.

NO SOALAN : 37

10. Dewan Perniagaan Amerika Syarikat (AmCham) di China misalnya, telah melaksanakan kaji selidik ke atas 430 syarikat Amerika Syarikat di China dan mendapati bahawa 30.9% dari mereka bersedia untuk mendapatkan komponen atau membuat pemasangan produk-produk mereka di luar negara China. Satu pertiga dari mereka mengatakan destinasi pilihan adalah Asia Tenggara. Ini adalah peluang. Jika kita tidak melihat ini sebagai suatu yang baik, negara-negara jiran kita akan merebut peluang ini dan kita akan ketinggalan.

Tuan Yang Dipertua,

11. Tidak dinafikan bahawa perang perdagangan yang sedang berlaku di antara AS dan RRC telah mengundang kerisauan terhadap pengeluar-pengeluar domestik dan para pelabur yang menjalankan aktiviti mereka di Malaysia. Kerajaan Malaysia tidak mengambil ringan atas kebimbangan tersebut dan telah mengambil langkah awal dengan menubuhkan Pasukan Petugas Khas Konflik Perdagangan Amerika Syarikat-China atau dengan izin, *US-China Taskforce on Trade Conflict* pada Julai 2018.
12. Pasukan petugas khas ini ditubuhkan dengan tujuan untuk memantau dan menangani perkembangan konflik perdagangan Amerika Syarikat-China dan juga tindak balas dari negara-negara lain. Selain daripada itu, pasukan ini juga bertindak sebagai platform bagi pihak berkepentingan untuk mengemukakan pandangan, komen dan maklumbalas mengenai konflik ini.
13. Pasukan Petugas Konflik Perdagangan Amerika Syarikat-China kini sedang dalam proses menjalankan soal selidik bersama-sama industri bagi mendapatkan maklum balas dalam merumuskan strategi untuk menangani konflik perdagangan Malaysia.
14. Selain itu, pada Perhimpunan Agong PBB yang ke-73 yang diadakan pada 28 September 2018, YAB Perdana Menteri juga telah

menyatakan pendirian Malaysia yang tidak menyokong perang dagang ini kerana ia akan menjaskan banyak pihak. Pada masa yang sama, YAB Perdana Menteri telah berjumpa dengan komuniti perniagaan Amerika Syarikat untuk berkongsi hala tuju kerajaan baharu bagi dasar perdagangan dan pelaburan negara. Perjumpaan ini berjaya memberi keyakinan bahawa kerajaan baharu adalah pro-perdagangan dan pro-pelaburan.

Tuan Yang Dipertua,

15. Bagi meningkatkan lagi eksport negara, Agensi Promosi Perdagangan Kebangsaan Malaysia (MATRADE) telah mengenalpasti beberapa kategori produk berpotensi untuk pasaran Amerika Syarikat dan China. Antara kategori produk tersebut adalah E&E, kelengkapan mesin, produk optikal dan saintifik, produk petroleum, dan juga kimia. Bagi negara China misalnya, pengurangan import kacang soya dari Amerika Syarikat akan membuka jalan bagi peningkatan eksport minyak sawit Malaysia ke pasaran China.
16. Kita sentiasa melaksanakan interaksi berterusan di antara MITI dan komuniti perniagaan seperti *American-Malaysian Chamber of Commerce*, *US-ASEAN Business Council* dan *US Chamber and Commerce* [dengan izin] menggambarkan komitmen dan keyakinan mereka, terutamanya dalam mengembangkan pelaburan sedia ada di Malaysia. Malah, delegasi *US-ASEAN Business Council* telah melawat Malaysia pada 16-18 Oktober 2018 untuk meneroka peluang pelaburan serta bertemu dengan beberapa kementerian dan agensi kerajaan, termasuk dengan MITI. MITI yakin pertemuan dan perbincangan terbuka seperti ini adalah penting untuk menambah baik persekitaran perniagaan dan meninjau peluang kerjasama dalam sektor-sektor berkepentingan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

DARIPADA : TUAN ROBERT LAWSON CHUAT [BETONG]

TARIKH : 29 NOVEMBER 2018 (KHAMIS)

SOALAN NO.38

minta **MENTERI PENDIDIKAN** menyatakan :-

- (a) senarai sekolah rendah dan menengah di Sarawak yang ada menawarkan subjek Bahasa Iban; dan
- (b) berapakah jumlah guru Bahasa Iban terlatih yang ada kini.

JAWAPAN

Yang di-Pertua,

- (a) Pada masa kini, terdapat sebanyak 778 buah sekolah di Sarawak menawarkan mata pelajaran Bahasa Iban. Daripada jumlah tersebut, 702 buah sekolah adalah sekolah rendah manakala 76 buah sekolah lagi adalah sekolah menengah.
- (b) Untuk makluman Ahli Yang Berhormat, terdapat 88 orang guru terlatih iaitu guru opsyen yang mengajar Bahasa Iban di sekolah harian di negeri Sarawak. Daripada jumlah tersebut, 43 orang guru mengajar di sekolah rendah manakala 45 orang guru lagi mengajar di sekolah menengah.

PEMBERITAHUAN PERTANYAAN BAGI JAWAPAN LISAN
MESYUARAT PERTAMA, PENGGAL KEDUA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

**DARIPADA : YB DATO' SRI HAJAH NANCY SHUKRI
[BATANG SADONG]**

**TARIKH
MENJAWAB : 29 NOVEMBER 2018**

SOALAN : 39

YB DATO' SRI HAJAH NANCY SHUKRI [BATANG SADONG] minta **PERDANA MENTERI** menyatakan apakah tindakan yang diambil Kementerian untuk memastikan “*unilateral conversion*” tidak mudah berlaku dengan sewenang-wenangnya.

JAWAPAN: YB TUAN MOHAMED HANIPA BIN MAIDIN
TIMBALAN MENTERI
DI JABATAN PERDANA MENTERI

Tuan Yang di-Pertua,

1. Berdasarkan Fasal (4) Perkara 12 Perlembagaan Persekutuan, Mahkamah Agung dalam kes Teoh Eng Huat v Kadhi of Pasir Mas, Kelantan & Anor [1990] 1 CLJ 277 dan penghakiman Mahkamah Persekutuan dalam kes Hj Raimi bin Abdullah v Siti Hasnah Vangarama bt Abdullah and another appeal [2014] 3 MLJ 757, telah memutuskan bahawa agama seseorang yang di bawah umur lapan belas tahun hendaklah ditetapkan oleh ibu atau bapanya (*parent*) atau penjaganya (*guardian*).

2. Merujuk kepada keputusan terkini Mahkamah Persekutuan dalam kes Indira Gandhi A/P Mutho v. Pengarah Jabatan Agama Islam Perak & Ors. And Other Appeals [2018] 1 MLJ 545, mahkamah telah mentafsirkan perkataan “*parent*” dalam Fasal (4) Perkara 12 Perlembagaan Persekutuan sebagai bermaksud jamak (*plural*), iaitu kedua-dua ibu dan bapa. Tafsiran ini terpakai jika kedua-dua ibu dan bapa seseorang yang di bawah umur lapan belas tahun masih hidup. Penghakiman Mahkamah Persekutuan tersebut adalah seperti yang berikut:

“[158] ... Since a literal construction of art. 12(4) would give rise to consequences which the legislative could not possibly have intended, the article should not be construed literally (*Sukma Darmawan* at 247). A purposive reading of art. 12(4) that

promotes the welfare of the child and is consistent with good sense would require the consent of both parents (if both are living) for the conversion of a minor child.”.

3. Sehubungan dengan itu, kedudukan undang-undang sekarang ialah agama seseorang yang di bawah umur lapan belas tahun hendaklah ditetapkan oleh ibu dan bapanya (sekiranya kedua-dua ibu dan bapa masih hidup) atau penjaganya.
4. Buat masa ini, Kerajaan tidak ada apa-apa cadangan untuk memastikan “*unilateral conversion*” tidak berlaku memandangkan terdapat tafsiran daripada kes Mahkamah Persekutuan yang menafsirkan bahawa persetujuan kedua-dua ibu bapa diperlukan bagi kanak-kanak di bawah 18 tahun untuk menukar agama.
5. Walaubagaimanapun, Kerajaan akan berusaha untuk memastikan dalam isu sensitif ini pihak-pihak yang terlibat cuba mencari jalan penyelesaian yang bersifat “win win” dan kebajikan anak-anak diambil berat dan Kerajaan juga akan memastikan tiada mana-mana pihak yang tidak bertanggungjawab memanipulasi isu ini bagi tujuan tertentu tanpa mengira ianya boleh menjaskan keharmonian agama, kaum dan etnik yang telah dikecapi oleh negara ini sejak sekian lama.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB DATUK AARON AGO ANAK DAGANG
(KANOWIT)**

TARIKH : 29 NOVEMBER 2018

SOALAN : 40

Datuk Aaron Ago Dagang [Kanowit] minta MENTERI DALAM NEGERI menyatakan status sebenar masalah dadah di negara ini. Di Sarawak masalah dadah telah masuk ke kawasan pedalaman dan membawa masalah sosial di dalam keluarga dan masyarakat. Apakah tindakan Kerajaan terhadap semua masalah ini.

JAWAPAN

Tuan Yang Dipertua,

Untuk makluman ahli Yang Berhormat Kanowit dan Dewan yang mulia ini, Kementerian Dalam Negeri amat memandang serius gejala penyalahgunaan dadah dan telah melaksanakan pelbagai langkah pencegahan dan pemuliharan dadah. Masalah dadah di negara kita adalah terkawal, dengan jumlah penagih dadah yang meningkat dari tahun 2013 hingga 2016, iaitu pada tahun 2013 seramai 20,887 orang, tahun 2014 seramai 21,777 orang, tahun 2015 seramai 26,668 orang dan tahun 2016 seramai 30,844 orang. Walau bagaimanapun, jumlah penagih dadah yang dikesan pada tahun 2017 telah menurun sebanyak 16% berbanding tahun 2016, iaitu seramai 25,922 orang.

SOALAN : 40

Masalah dadah bukanlah suatu masalah baru yang melanda negara kita. Ia menjadikan kesejahteraan rakyat dan membawa masalah sosial tanpa mengira kawasan. Dengan itu, Kerajaan telah meningkatkan usaha untuk membanteras dadah dan menjalankan pemulihan dengan lebih berkesan melalui langkah-langkah berikut:

1. Kerajaan telah memperkenalkan Dasar Dadah Negara yang telah diluluskan pada tahun 2017. Matlamat Dasar Dadah Negara (DDN 2017) adalah mewujudkan negara dan masyarakat Malaysia yang bebas daripada ancaman gejala dadah bagi menjamin kesejahteraan hidup bermasyarakat, mengekalkan kestabilan dan ketahanan nasional. Ia merupakan dasar yang holistik dan komprehensif yang boleh digunakan selaras dengan peredaran masa. DDN 2017 juga dijadikan sumber rujukan dan panduan utama dalam usaha memerangi dadah di semua peringkat pelaksanaan seluruh negara. Dasar ini mempunyai lima (5) teras utama iaitu Teras Pendidikan Pencegahan, Teras Rawatan dan Pemulihan, Teras Penguatkuasaan, Teras Pengurangan Kemudaratan serta Teras Kerjasama Antarabangsa.
2. Tindakan penguatkuasaan membanteras dadah yang sedia ada terus dilaksanakan oleh Polis Diraja Malaysia (PDRM) dengan memberi tumpuan kepada aktiviti pengedaran dadah. Agensi Antidadah Kebangsaan (AADK) pula memberi fokus kepada aktiviti pendidikan pencegahan dadah, rawatan dan pemulihan dadah serta penguatkuasaan terhadap penagih dadah. Di samping itu, AADK juga menjalankan program *outreach* bagi menggalakkan penagih dadah mendapatkan perkhidmatan rawatan dan pemulihan yang bersesuaian.
3. AADK dengan kerjasama Kementerian Kesihatan Malaysia juga telah memperkasakan program *harm reduction* dalam konteks perubatan dan pembangunan sosial. Ini selaras dengan perubahan semasa dan teras Pengurangan Kemudaratan dalam DDN 2017. Program yang sedang giat dijalankan termasuklah *Medication-Assisted Therapy* menggunakan methadone dan *Needle Syringe Exchange Programme* (NSEP) yang dilaksanakan bersama-sama dengan Badan-badan Bukan Kerajaan (NGO).

4. AADK juga menambah baik program pencegahan dan pemulihan melalui program *Community Empowerment* yang berasaskan komuniti yang menggerakkan masyarakat setempat serta NGO dalam menangani permasalahan penagihan dadah menerusi peranan yang perlu dimainkan oleh masyarakat seperti berikut:
- i. Penerimaan, iaitu masyarakat bersedia menerima penagih dadah yang sedang menjalani kepulihan (*recovering addicts*);
 - ii. Membantu dalam menyediakan peluang pekerjaan kepada *recovering addicts*;
 - iii. Sokongan sosial sama ada daripada keluarga, pemimpin komuniti dan masyarakat umum terhadap *recovering addicts*; dan
 - iv. Menerima secara berterusan terhadap perjalanan kepulihan (*recovery journey*) *recovering addicts* supaya mereka tidak dipengaruhi oleh faktor-faktor pengulangan penyalahgunaan dadah (*relapse*).

Kementerian Dalam Negeri berharap supaya semua pihak memainkan peranan dalam usaha menangani gejala penyalahgunaan dadah. Keterlibatan masyarakat setempat amatlah penting untuk pengekalan kepulihan penagih dadah. Oleh itu, AADK telah menetapkan sasaran *Key Performance Indicator* (KPI) iaitu 40% daripada jumlah klien yang telah menjalani program, kekal pulih selama dua tahun sebagai sasaran jangka pendek pada tahun 2018. Berdasarkan pemantauan dan penilaian, didapati kadar kepulihan bekas-bekas klien di Pusat Pemulihan Dadah adalah antara 55% hingga 60% yang melebihi sasaran 40% yang telah ditetapkan dalam KPI Kementerian untuk tahun 2016 dan tahun 2017. Ini menunjukkan usaha-usaha yang telah dilaksanakan memberikan hasil yang positif.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJI FADILLAH BIN YUSOF
[PETRAJAYA]**

TARIKH : 29 NOVEMBER 2018 [KHAMIS]

SOALAN NO. 41

Minta **MENTERI PERUMAHAN DAN KERAJAAN TEMPATAN** menyatakan apakah inisiatif pihak Kerajaan Persekutuan bagi **memastikan generasi muda mampu memiliki rumah berkualiti terutamanya kelompok B40.**

JAWAPAN :

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) sentiasa mengambil perhatian mengenai isu pemilikan rumah mampu milik bagi semua lapisan masyarakat terutamanya golongan B40.
2. Kerajaan dalam pembentangan Belanjawan 2019 telah mengumumkan beberapa inisiatif baharu bagi memperbanyak lagi penyediaan rumah di samping meningkatkan tahap kemampuan pemilikan rumah melalui penurunan harga rumah serta meningkatkan akses kepada pembiayaan, antaranya:-
 - a) **Inisiatif Penyediaan dan Penambahbaikan Perumahan untuk Semua**
 - (i) Kerajaan akan terus membina dan menyiapkan rumah mampu milik dengan peruntukan hampir RM1.5 bilion di bawah Program Perumahan Rakyat (PPR), Perumahan Penjawat Awam Malaysia (PPAM), Perbadanan PR1MA Malaysia (PR1MA) dan Syarikat Perumahan Nasional Bhd (SPNB).
 - (ii) Kerajaan akan memperuntukkan sebanyak RM400 juta untuk penyelenggaraan dan membaik pulih kuarters Kerajaan.
 - b) **Inisiatif Pembiayaan Perumahan**
 - (i) Kerajaan melalui Bank Negara Malaysia (BNM) akan menyediakan dana berjumlah RM 1 bilion bagi membantu golongan berpendapatan kurang dari RM2,300 sebulan untuk memiliki rumah mampu milik buat kali pertama, yang

berharga sehingga RM150,000. Mulai 1 Januari 2019, dana ini tersedia di AmBank, CIMB Bank, Maybank, RHB Bank dan BSN melalui kadar pembiayaan terkurang serendah 3.5%. Ini akan mengurangkan jumlah bayaran ansuran bulanan pembiayaan oleh peminjam untuk memiliki rumah, dan seterusnya lebih mudah mendapat pembiayaan. Dana ini disediakan untuk dua tahun ataupun sehingga peruntukan dihabiskan.

- (ii) Kerajaan akan memperuntukkan RM25 juta kepada Cagamas Berhad untuk menyediakan jaminan pajak gadai bagi membolehkan peminjam mendapat pembiayaan yang lebih tinggi termasuk bayaran deposit. Langkah ini dijangka memberi penjimatan kos antara 7% hingga 11% kepada pembeli rumah selain daripada apa-apa potongan diskaun yang ditawarkan oleh pemaju.
- (iii) Kerajaan juga akan memanjangkan tempoh pembiayaan perumahan sektor awam di bawah Lembaga Pembiayaan Perumahan Sektor Awam (LPPSA) di mana tempoh pembiayaan pertama dilanjutkan daripada 30 tahun kepada 35 tahun dan Pembiayaan Kedua daripada 25 tahun kepada 30 tahun.
- (iv) Kerajaan juga akan membenarkan platform penjanaan dana masyarakat (*property crowdfunding*) yang dipacu oleh sektor swasta. Platform ini akan menjadi sumber alternatif bagi pembelian rumah pertama yang dikawal selia oleh Suruhanjaya Sekuriti melalui pinjaman terbuka antara rakan setara (*peer-to-peer lending*). Sebagai contoh, pembeli boleh membeli hartanah terpilih dengan bayaran 20% nilai hartanah manakala baki 80% akan dibiayai oleh pelabur yang ingin mendapat pulangan kenaikan nilai hartanah tersebut untuk suatu tempoh.

c) Inisiatif Pengecualian Duti Setem serta Cukai Jualan dan Perkhidmatan (SST)

- (i) Pengecualian duti setem sehingga RM300,000 yang pertama ke atas surat cara pindah milik dan perjanjian pinjaman bagi tempoh dua tahun sehingga Disember 2020. Bagi pembeli rumah pertama bernilai sehingga RM500,000.
 - (ii) Pengecualian SST ke atas perkhidmatan pembinaan dan bahan binaan. Sebagai balasan, Persatuan Pemaju Hartanah dan Perumahan Malaysia (REHDA) telah bersetuju untuk mengurangkan sebanyak 10% harga rumah yang tidak tertakluk kepada kawalan harga untuk projek baharu.
 - (iii) Pengecualian duti setem ke atas surat cara pindah milik bagi pembelian rumah pertama, berharga antara RM300,001 sehingga RM1 juta berkuat kuasa bagi tempoh 6 bulan mulai 1 Januari 2019 bagi menangani isu lebihan harta tanah kediaman. Ini akan menjadi sebahagian daripada Kempen Pemilikan Rumah Kebangsaan di mana pemaju akan menawarkan potongan diskaun 10% ke atas harga harta tanah kediaman projek sedia ada.
3. Antara langkah lain yang telah dikenal pasti dan sedang diambil oleh KPKT adalah melalui pelaksanaan **Dasar Perumahan Negara 2018 – 2025** iaitu:
- (i) Melaksanakan rasionalisasi Entiti Tunggal Perumahan Negara melalui perpindahan agensi-agensi penyedia perumahan awam Kerajaan dan mampu milik ke bawah KPKT supaya perancangan untuk perumahan mampu milik dilaksanakan dengan teratur dan dapat memenuhi kemampuan pemilikan rumah mengikut kumpulan sasaran;

- (ii) Menentukan kategori harga rumah mampu milik mengikut ukuran kemampuan berdasarkan median pendapatan isi rumah mengikut kawasan dan negeri;
 - (iii) Meningkatkan penyediaan rumah mampu milik melalui kerjasama dengan pemaju swasta secara *cross-subsidy* iaitu penyediaan tanah oleh Kerajaan dan pembinaan dilaksanakan oleh pemaju swasta;
 - (iv) Memperluaskan pilihan perumahan melalui formalisasi pasaran sewa untuk memenuhi keperluan masyarakat yang pelbagai melalui kajian dan gubalan Akta Sewa Rumah Kediaman dengan menyediakan peruntukan khas melalui perundangan untuk melindung penyewa dan pemilik rumah.
 - (v) Menambah baik skim pembiayaan perumahan sedia ada untuk menyediakan penyelesaian inklusif serta mampan bagi kumpulan berpendapatan rendah dan sederhana dalam meningkatkan akses rumah mampu milik.
4. Kesimpulannya, langkah-langkah ini sedang dilaksanakan dan ditambah baik oleh Kerajaan bagi membantu dalam memastikan setiap rakyat terutamanya generasi muda dan kelompok B40 mampu memiliki rumah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : DATO' SERI HAMZAH BIN ZAINUDIN [LARUT]

TARIKH SOALAN : 29 NOVEMBER 2018 [KHAMIS]

SOALAN NO.42

Minta **MENTERI PEMBANGUNAN USAHAWAN** menyatakan langkah-langkah Kementerian dalam menggalakkan adaptasi teknologi industri 4.0 kepada usahawan secara menyeluruh termasuk usahawan kecil dan sederhana.

JAWAPAN

Tuan Yang Dipertua,

Sebagai sebuah negara yang bergantung kepada pasaran global, Malaysia perlu meningkatkan rantaian nilai dan menjadi pangkalan pengilangan berkualiti tinggi menerusi penggunaan teknologi agar negara lebih berdaya saing di peringkat antarabangsa. Industri 4.0 akan mendorong syarikat-syarikat tempatan untuk menggunakan automasi, inovasi dan teknologi terkini dalam proses pembuatan masing-masing. Ianya seterusnya akan membolehkan syarikat-syarikat PKS untuk meningkatkan kecekapan, produktiviti dan pulangan pelaburan serta daya saing industri tempatan.

Terdapat beberapa inisiatif yang sedang dilaksanakan oleh Kementerian untuk menyokong serta membantu PKS tempatan mempersiapkan diri ke arah Industri 4.0. Inisiatif-inisiatif tersebut adalah:

- (i) Program *Business Accelerator* (BAP) oleh SME Corp Malaysia bagi memenuhi keperluan PKS untuk menggunakan teknologi Industri 4.0. Antara elemen pembiayaan yang layak dipertimbangkan adalah pembelian lesen perisian, pembelian perisian dan peralatan dan automasi mesin serta robotik yang berkaitan. Insentif ini berbentuk geran bersamaan 50% sehingga RM400,000. Di bawah skim ini, PKS juga boleh mendapat bantuan pinjaman mudah sehingga RM1 juta pada kadar faedah 4% dengan margin pembiayaan sehingga 90% dan tempoh pembayaran sehingga 10 tahun.
- (ii) SME Corp. Malaysia juga sedang bekerjasama dengan Penang Skills Development Centre (PSDC) bagi memperkuatkannya 'local system integrators' untuk mewujudkan ekosistem bagi menggalakkan penggunaan teknologi Industri 4.0 di kalangan PKS.
- (iii) Gerakan koperasi akan terus diperkasakan supaya lebih berdaya maju dan berdaya saing dalam persekitaran teknologi Industri 4.0. Ini termasuk usaha bagi membantu meluaskan peluang perniagaan koperasi, mengukuhkan lagi perhubungan industri dan penyelidikan yang berterusan.

PKS juga boleh menggunakan platform *Program Public Private Research Network* (PPRN) di bawah Kementerian Pendidikan Malaysia bagi mewujudkan ekosistem mesra pengetahuan (*knowledge-friendly ecosystem*) melalui penyelidikan gunaan bagi meningkatkan produktiviti

NO. SOALAN : 42

dan pengetahuan teknologi industri untuk bergerak atas rantaian nilai (*move up the value chain*).

Kementerian juga akan memastikan program-program yang dirancang dan dilaksanakan dapat memenuhi Revolusi Industri 4.0 agar PKS tempatan kekal relevan dan kompetitif. Program sedia ada juga akan dikaji semula agar ianya selari dengan keperluan Industri 4.0.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : YB TUAN AHMAD JOHNIE BIN ZAWAWI [IGAN]
TARIKH : 29 NOVEMBER 2018 (KHAMIS)

SOALAN NO. 43

Minta **MENTERI KESIHATAN** menyatakan adakah pihak Kementerian mempunyai perancangan untuk menambah jumlah mesin dialisis di Hospital Daerah Daro, Bahagian Mukah kerana sekarang ini hanya ada 5 buah mesin dengan hanya 3 buah mesin sahaja yang berfungsi sedangkan pesakit semakin ramai dan bertambah setiap hari.

JAWAPAN

Yang di-Pertua,

Terdapat sebanyak 5 mesin hemodialisis di Hospital Daro. Kesemua mesin tersebut masih berfungsi dengan baik walaupun terdapat beberapa buah mesin yang telah mencapai umur 10 tahun. Pada masa ini, terdapat 30 orang pesakit yang sedang menerima rawatan hemodialisis di Hospital Daro. Hospital Daro ini masih mampu untuk menampung pesakit yang memerlukan rawatan hemodialisis di kawasan Mukah.

Memandangkan pesakit yang memerlukan rawatan dialisis di seluruh negara semakin meningkat, Kementerian Kesihatan sedang berusaha memperluaskan kaedah rawatan *Continuous Ambulatory Peritoneal Dialysis* (CAPD) di kalangan pesakit kegagalan ginjal peringkat akhir. Kaedah rawatan ini adalah berbeza daripada rawatan hemodialisis kerana rawatan CAPD dilakukan di rumah oleh pesakit sendiri. Kaedah ini akan dapat mengurangkan keperluan kemudahan hemodialisis untuk pesakit baru kegagalan ginjal peringkat akhir yang memerlukan rawatan dialisis.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPATBELAS**

PERTANYAAN : JAWAB LISAN

**DARIPADA : DATO' SERI DR. SHAHIDAN BIN KASSIM
[ARAU]**

TARIKH : 29 NOVEMBER 2018

SOALAN : 44

Dato' Seri Dr. Shahidan bin Kassim [Arau] minta MENTERI DALAM NEGERI menyatakan bilakah Akta SOSMA akan dimansuhkan dan apakah jaminan Kerajaan untuk memastikan bahawa dengan pemansuhan akta ini dapat menjamin keselamatan negara. Apakah jaminan Kerajaan bahawa penjenayah tegar yang dibebaskan itu tidak akan memberi ancaman keselamatan kepada negara.

JAWAPAN

Tuan Yang Di Pertua,

Kerajaan sedang mengkaji semua undang-undang berkaitan keselamatan termasuklah Akta Kesalahan Keselamatan (Langkah-Langkah Khas) 2012 (SOSMA). Dalam hal ini, satu Jawatankuasa Khas yang dianggotai oleh pihak-pihak yang berkaitan seperti Polis Diraja Malaysia (PDRM), Jabatan Peguam Negara (AGC), Badan Peguam Malaysia, Suruhanjaya Hak Asasi Manusia (SUHAKAM) dan badan bukan kerajaan (NGO) telah ditubuhkan untuk menilai dan memperhalus setiap peruntukan dalam undang-undang berkenaan dengan terperinci.

Memandangkan kajian tersebut masih sedang dijalankan, Kerajaan belum memutuskan sama ada undang-undang tersebut perlu dipinda atau dimansuhkan atau undang-undang yang baru perlu diwujudkan.

Kerajaan memberi jaminan bahawa pindaan atau pemansuhan terhadap undang-undang berkenaan tidak akan menjelaskan usaha kerajaan dalam memelihara keselamatan negara daripada pelbagai ancaman termasuklah ancaman daripada kumpulan pengganas dan jenayah.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : JAWAB LISAN
DARIPADA : TUAN AHMAD TARMIZI BIN SULAIMAN [SIK]
TARIKH : 29 NOVEMBER 2018 (KHAMIS)
SOALAN NO. 45

Minta **MENTERI PENDIDIKAN** menyatakan jumlah pelajar sekolah dan IPT di seluruh negara yang telah terlibat dengan kesalahan jenayah berat seperti pembunuhan, pengedaran dadah dan lain-lainnya serta apakah langkah Kementerian untuk mengatasi masalah jenayah di kalangan pelajar dan mahasiswa.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) sentiasa peka terhadap persekitaran pembelajaran yang kondusif dan selamat dalam menjamin kesejahteraan para pelajar Institusi Pendidikan Tinggi (IPT) di Malaysia. Ini termasuklah mengambil perhatian serius terhadap penularan masalah jenayah berat di kalangan murid sekolah dan pelajar IPT.

Berdasarkan data Pelibatan dan Tangkapan Pelajar Sekolah dalam Jenayah Indeks bagi Januari hingga Ogos tahun 2018 yang diterima daripada Kementerian Dalam Negeri, sebanyak 295 murid di bawah umur persekolahan iaitu antara 7 hingga 17 tahun terlibat dengan jenayah kekerasan. Manakala hanya 5 kes jenayah dilaporkan di Universiti Awam yang melibatkan kes penyalahgunaan dadah. Justeru, bagi memastikan kes seperti ini tidak menular di kalangan pelajar lain, KPM sentiasa meningkatkan sesi keterlibatan (*engagement*) dengan pihak berkuasa

seperti Polis DiRaja Malaysia, Yayasan Pencegahan Jenayah Malaysia (MCPF) dan Agensi Anti Dadah Kebangsaan serta melaksanakan beberapa inisiatif tambahan seperti berikut:

- i. Menguatkuasakan peraturan disiplin sekolah. Bagi kesalahan berunsur jenayah yang berlaku dalam kawasan sekolah seperti mencuri, bergaduh dan sebagainya, pihak sekolah diarahkan mengambil tindakan tegas berdasarkan peraturan sedia ada;
- ii. Mewajibkan penubuhan Kelab Pencegahan Jenayah (KPJ) di sekolah iaitu dengan MCPF. Aktiviti serta jumlah Kelab Pencegahan Jenayah (KPJ) di sekolah telah diperkemaskan dengan menumpu kepada golongan sasar yang berisiko melakukan jenayah di sekolah;
- iii. Memberi perhatian serius terhadap isu semasa seperti DAESH, gangsterisme, dadah dan lain-lain serta menyalurkan maklumat mengenainya kepada pelajar IPT;
- iv. Pemantauan dan penguatkuasaan disiplin pelajar di peringkat fakulti dan kolej kediaman secara berterusan melalui kerjasama diantara Jawatankuasa Pengarah Keselamatan Universiti Awam dan Majlis Pengetua Kolej Kediaman;
- v. Kerjasama di IPT melalui Majlis Kesihatan dan Keselamatan Universiti-Universiti Malaysia serta Majlis Kaunseling dan Kerjaya Universiti-Universiti Malaysia dalam merangka program membendung dan membanteras keterlibatan kesalahan jenayah berat dalam kalangan pelajar IPT; dan
- vi. Sesi perkongsian pada Minggu Aluan Siswa di mana setiap pelajar diberi penerangan mengenai kesalahan-kesalahan di bawah Undang-undang Malaysia serta hukumannya.

MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA

PERTANYAAN : JAWAB LISAN

DARIPADA : DATUK SERI HAJI AHMAD BIN HAJI MASLAN
[PONTIAN]

TARIKH : 29 NOVEMBER 2018 (KHAMIS)

SOALAN : 46

minta **MENTERI PEMBANGUNAN LUAR BANDAR** menyatakan perbandingan peruntukan Bajet 2018 dan 2019 yang sudah dan akan diperoleh. Berapa jumlah peruntukan dan projek yang dihentikan dari Bajet 2018 dan apakah usaha-usaha untuk menambah pendapatan penduduk di luar bandar.

JAWAPAN

Tuan Yang Di-Pertua,

Untuk makluman Yang Berhormat, Kementerian Pembangunan Luar Bandar (KPLB) telah diperuntukkan sebanyak RM3.86 bilion di bawah Belanja Pembangunan sementara di bawah Belanja Mengurus adalah sebanyak RM5.61 bilion menjadikan jumlah keseluruhan RM9.47 bilion diperuntukkan pada tahun 2018. Bagi tahun 2019 pula, Kementerian telah diluluskan peruntukan sebanyak RM5.42 bilion di bawah Belanja Pembangunan dan RM2.99 bilion di bawah Belanja Mengurus dengan jumlah keseluruhan adalah RM8.41 bilion.

Bagi bajet pembangunan tahun 2018, pihak Kementerian telah membuat penilaian semula projek/ program mengikut keutamaan berdasarkan kedudukan kewangan semasa negara. Sebanyak 3 projek telah ditangguhkan dengan kos keseluruhan projek berjumlah RM249.99 juta dan akan dipertimbangkan semula mengikut kemampuan kewangan kerajaan.

Untuk makluman Yang Berhormat juga, Kementerian sentiasa prihatin dalam mendukung agenda bagi menambah pendapatan penduduk di luar bandar melalui projek dan program yang dirangka seperti Program Usahawan Luar Bandar (Wanita Inspirasi Ekonomi, DesaMall, Program Peningkatan Pendapatan, Program Usahawan Teknikal, Program *Mobilepreneur*, Program Latihan Kemahiran Kerjaya, *Rural Business Challenge* (RBC), Program Sokongan Pengukuhan Keusahawanan Luar Bandar, Program Desa Lestari, Program Pembangunan Komuniti dan program-program kemahiran di bawah seliaan KEMAS yang menfokuskan kepada peningkatan pendapatan masyarakat luar Bandar.